


龍  
岷  
風  
雅

卷  
三  
十  
七  
之  
四  
十



龍眠風雅卷三十七目錄

木厓潘 江蜀藻輯

蕭山毛 牲大可 參

同里蔣 愚潜伯

周 岐 六十七首 趙相如 四十九首

倪元善 五首 程熙載 一首

王敬德 一首 李毓崑 二首

孫如蘭 十七首 胡代工 一首

龍眠風雅卷三十七

水厓潘 江蜀藻輯

周

岐

字農父號需菴崇禎朝以明經貢入京師屢

疏薦之即參宣督孫少司馬軍事以功復叙隨授  
河南開封府推官監直指陳公潛夫軍相國史公  
開闢淮揚又以僉事職銜題參軍務國變歸里以  
所居舍旁餘址築土室嘯咏其中溧陽陳相國欲  
授以官不應河漕中丞及江粵諸幕府爭延聘為  
上客雅非本懷竟謝病歸足不履城市終于土室  
公少孤事嫡母以孝聞博覽墳籍抉精冠華結童  
時即知名當世與同里方文爾止吳道凝子遠方  
以智密之孫臨克咸以博雅好奇聞于四方江左  
諸名士冠蓋欵集飲酒賦詩必推公上座所著有  
執宜集燼餘稿  
孝經外傳行世

擬李陵別蘇武詩三首

邊聲中夜起四顧黯無色遊子戒行期須臾遠離別携

手重行行悲風多慘冽與子結三載中懷時耿切今日  
雙黃鵠一飛一摧絕欲言寄無因傷心不可說生爲隔  
世人死葬蠻瘞穴努力謝故人九原以爲訣  
漢誠不背德韓彭何以族蕭樊見囚繫賈汲終斥逐在  
昔先將軍義勇天下服徒失貴臣意到身于絕域踈者  
日以卑睚者蒙厚祿陵也負漢恩志豈不自淑妻子爲  
鯨鯢老母被刑戮常當生死辭痛極不能哭  
男兒不成名死固在他鄉誰能復稽顙怵惕墨吏傍憶  
昔五千兵獨裹萬里糧追奔大漠外疲弊當其強單于  
親合戰振臂呼死傷如何漢廷論功過不相當前罪固  
莫贖後効或可將已矣勿復言飲泣裂中腸

詠懷四首

夜深寒露降蟋蟀鳴空堂西風吹敗葉蕭瑟號枯桑  
寒帷起回步薄寒中衣裳斗間無劍氣昂畢生光芒廓落  
懷友生中懷難自將秋蘭紉爲佩無以異衆芳仰天長  
太息憂思何多方

憶昔少年時尚志托詩書十三工詞賦浩氣凌太虛十  
五治六經耕穫忘菑畲管葛未足願豈曰計其餘奄忽  
二十年披褐守田廬開軒望四野徙倚步徐徐傷哉富  
春老白髮釣溪魚

鳳凰鳴高岡豈爲稻梁謀丈夫志四海豈爲名利求笑  
彼田園子白首戀故丘營營井里間富貴稱殊尤烏知

達士心一息翔九州

昔見少年子得意揚輕裘鏤玉爲腰鞶雕金飾馬頭手  
把珊瑚鞭往來狹邪遊朝從博徒飲暮宿娼家樓子雲  
徒自苦鮑焦非所求須臾失執間藍縷頓荒丘我思古  
人心何以慰我愁獨有著述士令名常悠悠

古別離二首

明旦戍窮邊親戚盈我堂中厨辦羹飯張燈羅酒漿阿  
母向子言汝去當自強風波不可定會面安能量一言  
未及竟淚下沾衣裳枯桑鳴悲風白露變爲霜起視夜  
何其東方白日光長跪辭阿親遊子束行裝收淚出門  
去妻孥號我傍平時非無別此別實難忘嘗當生死訣

思亂忽成狂生旣不得歸安知魂來翔

行行適交河前路何逶迤四望無人烟但見丘與陂城  
郭旣已崩隅濠又已頽白楊聲蕭蕭衰草滿前堤欲行  
不可去欲坐常自疑荒石提爲墻莘蓼持作糜忽逢故  
鄉人腸中喜復悲長跪問故鄉家中依阿誰老者日以  
亾少者垂冠綬寒耳不忍聽出涕如縷糜

送豫章萬茂先秋浦劉伯宗應徵辟

擊鼓深宮中通市無不聞良玉媚重淵鬱鬱上爲雲君  
子懷令譽卓犖自不群南陽雖有田豈必老耕耘浮雲  
蔽中天白晝苦不分肉食無遠謀翕翕如聚蠹奮身出  
塵埃判苦猶與薰春日步皋蘭蘭澤揚芳芬聖代重徵

辟蒲車何紛紜網羅及吾黨責之以玄纁勿以蓬華適  
非薄功與勲哲人貴及時况復得明君努力長安道三  
策振奇文

已卯春飲池陽吳次尾劉德輿羅季先寓中卽席

分韻得二冬

江南有天柱削立雙芙蓉隔江望吾皖亦有天柱峰褰  
裳陟其間上撫百尺松自非吾黨人蹶躄不可從清酒  
載百壺舉觴何從容抗聲發危言聽之若黃鍾靜者各  
有懷揔不同凡庸已卯春正月雨雪如窮冬蒿目視天  
下南北皆戰衝挾策數千言善守尤善攻豈必隆中人  
抱膝稱臥龍

經淮陰漂母祠懷古

執戟雖云卑猶勝一飯恩千金鮮報母蹙項不並存韓  
侯千古傑施報何失倫丈夫重知己官爵惡足論惜哉  
重瞳子不識哀王孫

婺女塗荅陳百史

蟾魄旣西蝕烏羽亦東藏烈烈驚風吹壁冷燈無光中  
有獨居女唧唧聞悲傷問女何所悲不字稱未亾豈悲  
衾與裯切恐人無良有客何方來將書委篋箱偏諸緣  
繡駟胡珠綴琳琅開緘讀書意姊妹舊稱行上慰顏色  
好下言夫婿當疊書置筐中却拜歸空房孤鸞戀枯澤  
彼鳳自有凰感君纏綿意還君明月璫寄謝諸姊妹勉

事新姑嫜

春夜月代作閨思

春花飛春月白春夜高樓獨嗚咽月照花飛墮曲檐人  
語不聞聞杜鵑去年此夜樓中淚正是如今春暮天君  
懷但覺江湖好妾畏風波心草草在家相對有尊羹何  
必年年輕遠道此時思君君不知長空願借西風吹聞  
說大江千萬里正恐西風無定時

風雪夜山中偶賦

一夜北風三尺雪四壁欲穿肌欲冽孤燈黯黯爐無烟  
兩手握拳冷如鐵溪頭活水聲忽死巖下勁松枝盡折  
喁喁擁足不成眠坐聽寒鴉叫荒穴

孫武公事騎射余常壯之頃同中丞方仁植先生

入楚賦寄

孫武公談兵說劍何其雄談兵說劍不足羨羨子偏衣  
短後挽強弓步行追馬躍馬上仰天射殺雙飛鴻鴻飛  
落落散空霧索筆即草驚鴻賦賦成字字如琳瑯長楊  
羽獵不足慕如今天子重專征中丞特簡方先生吾  
子借箸贊帷幄占星不復見欃槍欃槍久應滅掃穴犁  
庭無遺孽數莖鼠鬚何足論坐看吾子成豪傑

同秋浦吳次尾顧子方飲左子直昆弟宅席中賦

贈

丈夫不患交遊寡但恨所遇無知者羞說長千百萬家

要津塞盡惟車馬我來雙眼久不青仰天直視狼弧星  
狼星擘擘弧欲墮當堦側立舞青萍一人之敵不足學  
說劍談兵何數數寒帷且讀床上書一目十行差足樂  
有時得意忽狂呼舉步局踣徒唏吁自君好我聯朝夕  
把酒臨風興不殊君言當世多頻願我感君言爲痛哭  
吾儕富貴亦何難但患不能爲碌碌河南江北盡烽烟  
欲耕誰是隆中田從來好談射策上書事今日緘口不  
復言人前吁嗟乎蘇門長嘯豈得已傲視一世無知己  
我與君交自今始他年期許當如是一二人焉自足耳

均勞逸歌

爲李臨淮賦

方朔飢古來不平之事豈其一誰陳此語  
天子前那知天子先愀然李侯分符鎮南國正值江上多烽烟  
賊至江城城晝閉說劍談兵寂無計李侯橫槊刺輕舟  
曠目叱江使倒流江倒流賊辟易帳下健兒好身手更  
弄江濤江水赤行行十年中辛苦誰更同  
至尊一日動顏色詔書急下褒成功功成歸奏麒麟殿大官應  
上勛臣宴出入載筆朝明光不似江南輕百戰輕百戰  
爲君舞南有賊兮北有口誰均勞逸當其苦莫惜勞勞  
報明主

官兵行

賊近苦賊來賊至恐賊去賊來避有時賊去官兵在官



兵畏賊如虎狼但行賊後勢莫當鳴鉦擊鼓入村里馬  
索芻豆人索糧不擇雞與豚更驅牛與羊傾倉倒甕恣  
搜括排墻墮壁掘餘藏官兵得物喜民家失物悲語君  
且勿悲官兵醉後難支持東家少婦已被汚西家兒女  
終夜啼但得飽掠速颺去猶能老弱共舖糜一旦賊兵  
去已遠官兵夜起催朝飯大車橐重小車盈路捕行人  
遁輪輓行至前村計復生竟指鄉屯爲賊營丁男殺盡  
丁女擄揚旌奏凱唱功成君不見賊去人歸猶費食官  
兵所過生荆棘痛哉良民至死不爲非無如官兵勢逼  
民爲賊

義僕行爲新安金生賦金生始鬻身以養老母繼

割股以愈至人可以風矣

君不見李善存孤乳生汁又不見杜亮受笞無涕泣一  
者重義一愛才此輩何人名獨立新安市上有金生鬻  
身養親辭彜名風濤不避從其至手權重資恒得贏至  
人一旦沾風露諸醫茫茫不知措金生持刀祝向天割  
股進食衰顏駐嗚呼忠孝如今爲最難每一念之心常  
寒金生至性能若此可以愧夫巍然當世之衣冠

三十六芙蓉歌 有引

三十六芙蓉者太常龔芝麓几上石也大不盈  
尺其中層巒疊嶂不可記數而峰之秀出者三  
十有六狀若芙蓉然瀑布蜿蜒如白虹下飲山

麓隱隱似經人徑色含潤若蒼壁迨非人工所  
成米南宮得而寶之銘誌字畫悉端好其從來  
不知何自卽南宮迄今亦五百餘年物矣陵谷  
變遷所不淪爲沙礫者何限此石獨完好無殘  
缺太常公顧得之於市肆中而三十六芙蓉之  
名人始得傳其實焉南宮有靈當亦羨此石之  
得主也

西有名山名太華芙蓉萬仞開不卸東隅亦有九華峰  
凌空不在芙蓉下兩山相峙各爭奇令人想像多神馳  
止可遠望快胸臆近登不見花披離誰影兩山作片石  
隻手擒看不盈尺飛泉直下聽無聲勢若白虹挂危壁

逶迤盤谷徑轉幽隱隱似見人行跡鬼斧神斤削不成  
碧蓮天上墮雙英流轉不知何代物祇覺峰峰翠色蒼  
且明吁嗟乎陵谷變遷凡幾易萬劫千灰堪涕泗此石  
完好無虧殘依稀猶見南宮誌南宮愛石僻且堅經其  
賞識必可傳自宋迄今五百載其間存沒幾人憐至寶  
繇來有神護不遇其人不輕付落落賈肆翳塵沙觀者  
掉臂誰能顧一代風流龔太常摩娑拂拭增輝光移來  
几上日相對客至共出傾壺漿米元章龔太常前後傑  
出名姓芳胸羅五嶽氣昂藏手撫二華何徜徉芙蓉三  
十六一峰傾一觴太常醉舞客益在在歌同此石無疆

哀王孫

弔韓侯醉淮水淮水不清顏色紫至今佇想萬人英當年却出三家市市中惡少爭相侮知己獨逢浣紗姥王孫可辱亦可哀丈夫爲鼠復爲虎手提佩劍造漢圖擒王縛將如割雞嗟彼拔山蓋世之雄傑竟斃俛首勝下之怯夫假王不足爲真王亦何負一飯不忘恩寧肯竊漢紐竒哉鐘室冤千古不得剖功高宜觸兒女忌丞相故人亦爲反覆手弔韓侯空延佇持將一瓢酒灑向淮河渚漂母尚有祠侯祀竟無處漢廷之雌毒勝雄淮陰之男不如女

梅花落

窻下落梅花風吹楊柳斜欲隨千里客羞上七香車小

苑迎朝日空堂照晚霞那堪深夜雨獨坐怨琵琶

劉生

關東多任俠千古重劉生馬上雕弓滿腰間血刃明公卿爭避席天子亦知名薄醉拂衣去城西報不平

秋閨怨

嫖姚征冀北六郡盡從軍一夜秋風至千家砧杵聞凝粧愁皓月寒露冷紅裙惟見遼城雁翩翩入斷雲

東歸

寒溪鷄犬寂風疾日將昏終歲雙扉掩空堂三楹存蟻蜻纏故榻灌莽亂荒村含涕無兄弟傷心誰與言

懷錢幼光

龍鼎風雅卷三十一  
佳會在何日中庭桐始華幾時沾白露八月見黃花故  
徑多荒草秋山照晚霞高樓時悵望風急雁飛斜

聞賊復圍桐思老母陷城中外絕救援孤身千里  
進退無策

孤城千里絕况復百重圍白髮難持戶荒園應苦饑尺  
書望不至長夜夢空歸時有臨風淚盈盈酒飯衣

阻風燕子磯登懸壁半閣

流離逢世亂特特上漁磯海水橫江湧林鳥匿樹飛因  
人辛苦慣作客姓名微分向風塵老逢迎何處歸

寄懷白子皮

故人何所托家住石塘灣綠水常環戶青松獨閉關往

來無驛使風雨發愁顏落日高樓上惟看飛鳥還

辛卯長安得家報喜舉一孫兼聞歲荒盜發又不

覺憂從中來也二首

凍雨寒爲雪孤燈客思煩萬金傳一札雙眼拭多昏下  
第休嗟汝添丁喜見孫昨宵清夢吉或可亢吾門

離家五甲子松菊近如何喜見平安字愁聞水旱多石  
田年不種租吏日相訶避亂方安堵那堪又荷戈

吳城謁張東平王廟卽依睢陽聞笛原韻

高祠湖上臨乃在此山陰錢是生前骨丹留死後心晚  
烟香不盡野水澹然深日落濤聲壯爲公作羽音

古意

音甲辰卷三十一  
擣衣砧上別離聲少婦高樓子夜情翡翠屏開寒露入  
珊瑚簾捲朔風驚懷人千里枯楊戍擊柝三更細柳營  
願作流黃機上月年年猶得照邊城

塞下曲

九月繁霜木葉稀驚風千里亂沙飛將軍赤兔金爲勒  
戍卒黃龍鐵作衣橫角夜吹聞四野長戈朝試解重圍  
關山多少征人淚不及孤鴻天外歸

再遊齊山

岳武穆遺碑感懷  
沽酒遙知青樹林名山負郭再登臨重巖曲曲尋前徑  
翠竹森森憩舊陰檻外湖光搖綠水樽前芳草和鳴禽  
翠微亭畔悲風發古木猶成北伐音

中秋夜別汪大年

落日西山照北城高樓置酒坐前楹銜杯萬里來秋色  
倚檻千門見月明長笛暗吹垂柳曲前村忽度擣衣聲  
明朝鞭馬關山遠愁聽鳴鷄報五更

冬日訪齊方壺龍眠山房

北風動地滿荒丘曲徑山深晚更幽薄照不消殘雪積  
清溪時帶斷水流到門松檜皆成拱入座琴書自可留  
猶有落花如昔日飛飛常集故人裘

太史姚現聞先生招飲席中賦

暮捲疎簾坐北隅涼風天末下高梧安投孔氏通家刺  
快得燕公小友呼策建三朝依衮座雲成五色映蓬壺

只今歸去人相問作賦能從漢大夫  
同曹給練大箕飲宗侯朱勃海園

簾捲珊瑚月到門高梧隱隱覆文軒  
臺茂王孫草亦尊西苑風流誰得似東阿詞賦自無倫  
莫言書省人歸晚永夜猶堪更倒樽

病中雜咏二首

孟浪經年獨苦貧支床鷄骨復誰親  
開眼明明見故人市上驅車爭逐道坐中笑我醉汚茵  
持湯老婢驚殘魄依舊呻吟一病身  
六月飄風萬里陰滂滂雷雨響荒岑  
一椽牛屋上通下牛畝菹宮淺更深  
落日溪蛙鳴釜底殘更山鬼弄鴉音

長沙多病緣卑濕賦鵬尤堪傷客心

喜迎中丞方仁植先生還里門

欲反離騷問汨羅至今聲老洞庭波  
雲中舊牧堅言戰丞相天威只講和  
狂客悲來三策廢仙人舟去五湖多  
秋思豈為鱸魚膾滿耳江潭漁父歌

紀事三首

直指旄頭氣不平燭天烽火照人行  
秋高自撤長城險春盡猶聞口馬鳴  
莫笑于鬚多棄甲徒知枵腹即呼庚  
中原萬骨枯將滿願祝功成一將名  
將隨蠟表達京畿臨濟淄青並報圍  
血染野蒿三月死燕依疲客五更飛  
荒城極望炊烟絕燐火平欺日色微

結伴頽垣驚晝伏分糧飼馬不知饑  
雞犬無聲北斗斜但聞中夜亂啼雅  
丁男高下埋新塚子女流離說故家  
白晝逢人疑鬼魅陰風吹木盡邊笳  
初歸何必千年鶴城郭皆非捲暮沙  
自宣大叅軍還長安李舒章贈詩步原韻  
長揖初歸折幅巾客星遙見夜來新  
暫披襟襖從顏闔且脫襜褕附耿純  
露板交馳爭入塞金城孰肯議留屯  
習聞邊地多男子怪我相逢少異人  
山人自去正時多

松關靜證

丹竈依稀未可尋黃芽還自印吾心  
疎籬雨過門衝虎落葉更深鬼嘯林  
夢魘巴童沉不醒風吹破壁細如吟

明朝訂有山僧約收拾筇枝踏碧岑

得方密之粵中書云已祝髮寄詩有千秋摠是三

生夢五嶽空埋九死心之句悲不自禁用原韻

雙龍兩地各悲吟孤劍飛潛瘴海深  
豈不懷歸腸欲結試看今日髮誰簪  
餘生已歷多生劫百死難消不死心  
十載天南傳雁帛開緘一字一沾襟

客中初度得無可上人扎

岐路東西泣向誰布袍堅耐北風吹  
美人一水隔天遠處士四星當戶垂  
持節嘆君歸國苦無錢笑我買山遲  
朝來攬鏡鬚眉在短髮霜凝不見絲

吊故相國史道鄰先生

舉目河山勢已更當年百戰此危城恨留一矢浮圖著  
臂刺孤忠血跡明擲杖長憐孝父沒揮戈難起魯陽生  
相看惟有庭前柏猶宿棲鳥向我鳴  
偕家鶴田義臣登望湖亭  
名根剗斷久無聞何意登臨復共君山勢西來東岸合  
江流一派兩湖分平鋪素練明如鏡忽動微波織似紋  
我欲乘風借羽翰飄然携手賦凌雲

吳歌

懽心太愛妾折花比顏色儂顏那似花花落願相憶

大龍山

嶺上秋風起深林白日昏亂雲迷澗壑何處石塘村

詠菊

菊下開三徑門前恰五柳時見白衣人不餉陶潛酒

夢全李白遊山水間

晝上先生亭夜作先生客爾爲醉謫仙我爲醒太白

雜詠四首

卜式千緡拜爵李廣百戰不侯乃知牧羊有用不若射

虎多憂

范蠡扁舟得意向平五嶽空談清酒中山千日黃鸝雨

後雙柑

子房狀如女子南陽弱不勝衣一旦擊秦鋤魏請看蠖

屈龍飛



出不能入鬪具死亦當五鼎烹縱爾蘭摧蕙折終勝蕭  
敷艾榮

西宮春怨

昭陽槐柳拂輕風玉輦今臨第幾宮收淚再看明鏡裏  
玉顏那得不相同

長夜怨

御苑更殘聽唱籌熒熒銀燭照簾鉤鑪邊獨坐持金筋  
淚濕寒灰不舉頭

懷方密之遊姑孰

十里違山聽蟋蟀思君舟楫在當塗曾將池畔驚人句  
携上青山搔首無

登謫仙樓

采石磯頭醉濁醪興來鼓掉大江濤慙慙莫負亭邊月  
會照當年宮錦袍

釣臺詠懷

蹙項興劉反掌看弓藏身盡未央寒看來大將登壇幟  
爭似長淮一釣竿

秋日野望

倦眼登臨強欲開剝山殘水載秋來饒他醉葉紅如火  
不是春風淑氣催

彭澤弔古

一片停雲寄柳絲陶家風韻未全移先生應在桃源裡

欲覓漁郎知是誰

湖中卽事

衰髮惟宜拄杖隨  
那堪風雨怨舟遲  
峰頭五老應相笑  
深坐雲中不許窺

趙相如

字又漢天啓間諸生讀書盡四庫手鈔典籍  
丹黃儼然爲文震蕩押闔奇氣鋒出時流莫  
之或先也事孀母婉容愉色嘗以寒素無氣力不  
得請于朝旌揚母節爲恨崇禎四年詔求直言  
上治平十二策阻于權貴不果進晚歲家于五嶺  
室廬墊隘田入至不足供饘粥所著載園詩稿其  
愛君忠國憂時愍俗之作諷諭  
婉約怨而不怒有詞人之風焉

雨夜

微雨來寒夕空堦有秋聲  
衆木何森然齊爲中夜鳴  
久客無所夢凜此肅殺情  
觀閒任自然萬物徒營營  
始知

天地大至教難爲名  
一念但不起道心  
繇此生

修禊日同謔玉長朱清  
瑟秦虞桓王燕友僧審淵

社集得酌字

曲屋護輕花修簷喧孔雀  
美人時一來霽日展芳約  
豈無古人思詩懷臨廣漠  
執筆弄烟嵐上與浮雲薄  
起視東西風悠然開我幕  
此意當誰知且盡花間酌

喜龔諧玉楚還併得尹達孝升書

故人楚天至與我故人書  
開書再三讀清風來徐徐  
宦况若孤雲寒峰自卷舒  
食祿澹如此作客貧何如  
君行桐子國遙山隔敝廬  
赤風蕩千里子遺當無餘  
對君長嘆息抱策將焉攄  
君行何嶮巇汎波復涉澗  
荆榛大道

旁豺虎何時除遊子幸歸來欣於見面初  
城居雜詠  
置身秋月旁秋風颯颯至有客叩扉牽衣發長喟世  
間輕薄子友道成棄置黃金盛萋菲白日叢魑魅澗翻  
口血殷譎張玄黃易問余余不言濁酒請君醉昨值籬  
間花小閣晝嘗閉蒼狗與白衣總是浮雲意我既返無  
懷彼哉安投畀

招寶山觀海

江山積旅吟芳思入寒碧一葉窮東南歲盡不知客乘  
潮胡所之遠挂蛟門席朔風揚怒波海天勢欲割空遙  
不可支更上高高石回眄諸擊雲已絕飛鳥迹太虛夫

何心晝夜此潮汐成連旣已逝清響將誰格而我撫孤  
絃長嘯弄烟隙

同慧生集范小范齋中

草木變園林秋聲翔遠壑天際集遙心白雲寓微託美  
人紛靈修清齋延村若高臥烟塵間萬卷擁華閣披帙  
攬孤懷陶然足酬酢萬象于此深靜者得其略宴起月  
還來仰視微雲落客意夫如何引樽彌以擴

酬吳震生餉米

有鳥曰倉庚三春發嘉唱老農急西疇時雨祝帝貺荷  
鋤觸炎威逾秋力始償如何頌讀儔虛名冀實卷賤貧  
道所安饑餓理云當矧余亂離軀十年逢屢劄旅爨寡

微烟 國家新淪喪他鄉空謂人無計媚枯臙良執敦  
古心手進顛連杖玉粒分朝饗床頭士仍壯簡匣理青  
萍誓使狂烽盪昨聞羽檄馳機槍逼淮上揮涕望中州  
死殪道相望焉得慈懷舒盡沃君子餉浩浩大江流傷  
哉萬里浪

薛仲翊見遺近著賦贈

高天寒楫空江裡華雲夜蔭居巢水溯洄遙問草堂人  
一編手握雄風起憶昨黃巾起湖畔湖流盡赤人烟斷  
聞君辛苦脫網羅乞師慷慨凌霄漢可笑中原行路難  
天燾高牙半賀蘭祇今三度嘶驕馬孤城不見登陴者  
多君考古觀兵地東顧石頭北鳳泗娓娓千言苦不休  
能爲桑土善綢繆梁甫高吟夢未覺長沙太息淚頻流  
憐余病骨殊草草澄清愧不致身蚤看君俠槩當封侯  
何事銜杯空潦倒吁嗟乎天下大勢已如此仗劍關弓  
呼駮駢君言客意竟何如明日長安獻天子

寄蔣一个

蔣子有官不肯就被衲高冠談宇宙權歌霜夜弔湘靈  
披烟手拂瀛州袖前歲上書侵公輔酒酣欲搥平原鼓  
意氣難降世所違漢陰聊息千鈞弩白門蕭蕭羸一身  
登堂垂白難許人青巒紫嶽從知己桃花何必武陵春  
江上喜晤方中丞仁植

匪風發兮匪車偈慘澹孤舟半明滅隔江遙見古雲垂

有客三湘舊秉鉞聞君飾鉞摧狂狡三軍屢捷歌騰飽  
誓師泣血淨神州主計多謀成中撓君言此事已成灰  
風吹黃葉上高臺臣心已荷明主鑒縱我閒吟到草萊  
聽君此言泣如雨東南半壁誰安堵故園鐵騎滿山頭  
盡是前日監軍撫

同葉潛之飲龍舒朱綬若宅賦贈  
東海辭秦帝夷門鼓晉軍古人高若輩之子更超群積  
雨深秋色清樽過夜分欣陪知己話劔氣欲凌雲

史長惺先生歸自山東詩以訊之  
千里星輶至都從劍戟過東方事乃爾北闕算如何  
馬已虺隤甚人猶慷慨多閬村三徑在石上長藤蘿閬村

予與潘次  
魯讀書處

金斗贈別杜直卿兼訊沈仲連蕭尺木諸子  
君才應用世猶作汝陰遊坐此寒塘月同分客舍秋  
關青嶂曲烟滿白蘋洲佇望江天遠行歌問酒樓

秋山黃葉裡客至共銜杯種樹雲嘗護開門月自來  
霜巖威欲勁禽定影無猜不覺清言永燈花已數開

迴艫依岸草極望暗層林獨權將明月清宵導遠心  
貧欣塵事省病驗道情深所愛江光媚秋陰染客襟

中秋得月同朱清瑟何麟兮許石疏隈居字

屢厭雲生戶誰知向夕除公然酬令節于此破門居靜  
理光難竟寒香影自如花前勿便醉共爾譽盈虛

九江舟中

江程何渺渺風雨護前途回舫過彭澤微山近小孤石  
根翻怒水木杪漾平湖自覺身無繫逢人問酒徒

山王五岳

携樽過浴蓮菴寓齋曾請開門且自來  
招提臨古市僧定渾無猜客意從孤寄主人能數來  
峰生几席涼雨到觥罍日暮村烟動山翁醉不回

逖玄載酒

同默公見過山泉與月同公寄舍  
故人每乘輿得句叩柴門二妙復攜手一樽重細論  
時尊語默憂亂減饗殮醉去君猶戀明當剝啄繁

於昌道中

登臨殊草草閱歷等虛舟中夜見明月同余江上秋  
聽人談近事到處有深愁却笑謀生拙饑驅尚未休

唐昌卽事

一邑群峰裡清齋晝不紛樵聲驚臥犬石徑宿寒雲  
引衲搜遺事看碑想斷文應憐遊子意閒醉向斜曛

鄱湖

洪流長灑灑小艇受風輕天水從遙合烟巒向晚明  
歸潮開犢路旋馬激霜聲已見前峰月炤余獨夜情

大孤曉發

駛涉連朝席高風曉又翔宵更收岸柝石火響鄰航  
帆

掛霜如草星移月觸床此時塵界想烟水總茫茫  
吉安舟中

霜宵恬旅夢倦楫傍香城靜夜誰堪語寒河共此情聽  
風詢水道隔岸咿雞聲渺渺遙天末孤帆屢計程  
美人鼓瑟

綺閣調宮徵閨情不自繇數峰江上曲一葉洞庭秋玉  
笋流香韻金風送遠愁此時天際客寒雨滿孤舟

送潘次魯還白門兼訊定園先生

揭來江上柳依依三月烽高賊騎飛痛哭軍門淹七書  
偏師間道解重圍萱堂夜別蛟臺畔蘭漿春回燕子磯  
戎馬猶多西北壘期君揮涕賦無衣

寄張恢生

頻年失意氣難平聽爾悲歌百感盈朝議偶然行薦舉  
家貧終不脫諸生春來寒雨墮金斗江上秋風到石城  
典盡鸕鷀還命醉中原何日罷談兵  
春香同君如諸子集葉明府春暉堂  
十日春風集畫堂烟雲夜夜引樽長清言盡入梅花韻  
綺氣遙分蕙草香世界不容嵇叔懶江天尚見次公狂  
對君多少悲歌意潦倒難禁雨一床

西風吹淚白門前

西風吹淚白門前痛哭心知二十年惠子竟先莊叟夢  
鍾生長破伯牙絃誰同膠漆羞榮舉歲不龍蛇阨大賢

欲訴高旻腸已絕那堪烽火隔江天  
西風魏德甫詩別葉使君卽和其韻懷之  
野外離離香稻肥新箋小展韻橫飛聞君久擅三都草  
作客還悲九月衣抗論莫嫌唐淚數高歌寧獨郢聲稀  
可能青雀遙相待我亦江天帶葉歸  
十日銅旅述懷呈鄭明府  
春香不發歲寒華撫調難成古伯牙一劍風塵誰可試  
十年烽火久無家孤心入夜凋于葉老樹驚吹慘似笳  
彈缺歸來吾已矣故園回首隔天涯  
群策勲名在鼎鐘英籌何日殪元兇十年議撫煩司馬

四爵新班起臥龍河伯威能爭豫壤泥丸隙竟潰函封  
荒原萬里春田草壠上誰明盛世農

從李彥卿贊畫乞醫方  
瓊田時有草芽香道力還于入世長屢擁貔貅麾赤羽  
閒馴龍虎搗玄霜孤心近日衣惟白半夜開書石是黃  
意氣天涯知己重衰顏輕竊土池方

姑嫂詞

嫂自理閒琴姑獨勞機杼頻聞喚姑聲停機更不語

山房

道人久忘機看瀑偕鷗鷺倦遊者誰子停驂呼晚渡

古意二首



作畫不作山作山不作樹山與樹爭高遮歡去時路  
夜雨何茫茫芭蕉聲難止我有百千心都在芭蕉裏

詠古二首

琴心誰辨手中絲買賦千金又一時若使當年無漢武  
高才惟有婦人知

大隱金門幾歲華人間彈指付烟霞蟠桃一耐三千季  
何不山中嘗看花

張俠生爲余畫美人走筆訊之

畫松便似真松樹畫美如何似美人莫道張公髯似戟  
前身應是子房身

送龔孝緒之伯兄孝升署中

楚國風流天下聞官衙墨霧疊秋雲眉齋若作眉山譜  
夜半庭前呼卯君

江南曲四首

樓船簫鼓動江城長板橋頭落日橫少婦不知烽火急  
櫂歌猶唱鳳陽聲

蠶箔新科異昔時桑田賴有土膏宜寒林一望成霜雪  
又是明年四月絲

漁燈遙岸指江灘盪漿深深下急湍生長姑蘇臺畔女  
浮家小小在長干

香傾竹葉敵高寒理策還尋玉女潭遙笛忽聞天外響  
美人乘月步欄杆

西湖卽事二首

展繞平蕪石徑斜  
玉簫引醉入梅花  
蘭橈尚見前朝勝  
腸斷春風蘇小家

平堤霜徑草全迷  
載酒湖邊手自攜  
攬勝謾尋歌舞地  
孤懷吟過段橋西

海上詞

大汛先春整畫旂  
舳舻多載伏狼機  
占風只俟清明候  
結束軍門看打圍

陽羨署中送張詣將還湖口

共君隔歲話悲涼  
風雨人情幾斷腸  
今日扁舟重下淚  
新聞烽火滿潯陽

倪元善

字玄度號資生太僕吉旋公之仲子也少負才望鍵戶績學工古文詩辭尤善鍾王書法束髮隸弟子員餼于膠序萬曆己酉中副車天啟甲子父挈之遊京師入北雍因子天印丁卯登鄉舉遂棄帖括甲申以左侍御貞介公阮懷寧石巢公薦授工部司務乙酉棄官歸里與左貞介姚樗叟兩先生逍遙山水觴咏間所著有小嫺嬛諸集行世

越遊舟中感懷作長歌

杖策紛馳洛陽陌  
摩霄虛擬扶搖翮  
已酉中荆璞三獻

血淚枯蘓書十上  
絲鬢白敢嘆我生命  
不猶敢嘲笑門

瑟未收英雄濩落常  
如此花鳥弄人亦何尤  
運會龍蛇

亂瘼驚田園荒穢鼠  
縱橫挈妻攜子江干走  
地覆天翻

遭毒手咄嗟斷送老  
頭皮幸仗金剛脫陽九  
三日前夢

剛經敝貂遺卷一霎空  
踉蹌不于暮雲東  
親朋見之驚

且喜車耳慶餘得不死授餐特慰季女饑開顏且醉穆  
生醴正好要女與和予無端風雨歲時除况復高高那  
可問西河抱痛長歎歎壯懷嗟已矣隙駒迅如駛放浪  
形骸外恣探名山水三十六洞揚仁風洒碧亭前叱馭  
通但取鱸蓴能佐酒漫信猪肝可送窮君不見世情冷  
暖古道希安得格澤爲駕蛻爲衣又不見三萬六千如  
石火何用勞勞名韁與利鎖清夢煮黃梁初蘭幽自芳  
試看袖裏珠還在靜悟無生禮梵王

大悲閣

偶坐憑虛閣閒雲鎮日深岩巉龕古佛潭靜照禪心蝶  
夢身原幻蜉蝣浪至今何如叅學者漱石枕清音

王左三山侍御惠衣謝之

何來錦繡段裁就薜蘿裳雖念鶉猶結將無鶉在梁春  
隨淑氣轉日共暮雲長子佩重堪憶悠悠咏不忘

除歲和石巢韵

內外雙無卜夜深堂開綠野醉雲林但傾樂聖如泉酒  
不解憂天捧日心憶管篆文徒小草攜來筇竹任登臨  
年年願上椒花頌郢調寧賡白雪吟

省大兄金華

花萼樓頭茱酒香飲冰先喜一開堂君山舊憩棠陰月  
澱水新凝午夜霜兄有循聲驅太虎弟無仙術叱成羊  
臨行握別還相念願召龔黃入建章

程熙載

字完白父參字公樹惇守信著有箴世瑣言

輒高等

以積學坐臯比授生徒先德行而後文藝

問字者

如坐春風飲醇醪古季友祥順篤實光輝

與人之

明末以歲貢試大廷旋棄之而歸仍與

諸門人

講學不倦晚歲舉胸中所得整比成句有

如連珠

視瑣言更爲詳洽題曰贈言其子品綬而

傳之洵

世道人心之一助也年八十七賦詩別宗

親與子

訣皆修身理性之言不及家事稱疾六日

端坐而

逝所居宅旁有馬

頭山學

者稱馬山先生

絕筆辭

松栢何嘗不漸零循環原自有枯榮不留人世愁眉事

自向天宮

放膽行似我兒孫還肯構傳家筆墨是躬耕

從容揮手

當今日今日方能證此生

王敬德

字明甫兵馬指揮鳳梧公之仲子也家故裕

常滿有

孔文舉之風兄心谷病瘵明甫口承其

痰唾兄

死訓諸孤皆入黨庠邦鐸邦鏡其白眉也

好蓄書

架盈萬卷客假讀輒與之不還亦不取索

生平工

集唐詩所著作出人意表秦寇之亂田園

子虛詩

亦蕩爲鳥有矣今所錄者得之李子士雅

口中益

士雅曾主明甫家塾且爲予言明甫古篤

行君子

竟死于悍卒之手天道不可問比比然也

又記得

吳紹勳集未詩二句云不識鳥歸何處去

却招僧

向此中來嘆爲

雅絕其

全篇亦忘之矣

十六夜月王孟常潘緋郎維南倪右臣吳集未李

士雅同集草堂得江字

中秋難見月此夕廢銀缸樹樹蟾光爛山山墨氣降同

人剛七子拈韻得三江不覺歡窮夜鴉飛過曉窓

李毓崑

字攻先一字他石崇禎初諸生年少時風流

凡數十百首多雕香鏤翠如其人後繼城折足死

死後詩散失罕存者李子士雅病中從枕上思得

其近體二首有風格有聲調亟登之又警句如秋  
草墻陰綠春鶯樹杪黃欲拔芙蓉劍親屠虎豹羣  
一燈秋寺裏三管雪窻前雲喜多峰來又別雨催  
六月去還留雁行一辭蘆渚燕子雙雙到草堂  
皆考功文房之餘韻也李子又思得王珣爾玉詩  
其卜居云忽厭城居隘西疇踏幾回商量買幽築  
須種數株梅即事云誰家燈燭夜輝煌散子聲聲  
響出墻半醉顛狂斜著帽長歌踏入賭錢場二詩  
向已闕如頓獲全璧  
附見于此亦一快云

六月六日方玉文搢公彭子及陳子垣家士雅集

東郊雨宿書舍

赤日炎歊甚諸君破綠苔一時雲氣集四面雨聲來荷

葉翻珠子蓮香浥酒杯相留邨舍宿刻燭見詩才

秦寇徧城諸將軍堅壁不戰感而賦此

十萬黃巾控馬飛孤城誰把肉屏圍美人竟夕敲檀板

時羅孫龐左諸將皆頓兵大將多時解鐵衣市上只添

鳩鵲面師中莫測鬼神機聖明天子無疆福不見江淮

盜賊稀

孫如蘭

字晚生自署曼衍老人兄弟凡五人以各檢

而游子弟蕭然矜式甲申後即致諸生舌以代耕  
接今輯詩將竣孫子喈公貽我二函始知廣平一  
賦賢者固不可測也集中警句頗多如亂後返故  
居云寒鴉無古木春燕失空梁病吟云泉石皆成  
癖參苓豈是方山居云鈞動沉潭月鋤開宿嶺雲  
移來石似丈種得竹稱君憂旱云攬鏡驚難免同  
歸鄭俠圖訪舊云叩門不見曾迎犬隔岸疑浮舊  
狎鷗感懷云擊賊有心惟少笏報仇無客且懷樵  
紀事云豈有一軍持縞素但聞百爾載玄黃感賦  
云蕪田望歲豐猶歉籩卜疑神吉亦凶訪友云賢  
非孺子誰懸榻豪豈元龍自封憶子被賊擄云青  
不具空存豆馬鬣雖崇未是封憶子被賊擄云青  
鸞花下將雛舞黃犢山間傍母眠茅屋被風云落

龍眼屈雅卷三  
花次第穿梁入列宿分明欹枕看下榻長松閣云  
徒賦佳句寢成癖未有奇文可送窮江子長山居  
落成云鶯啼幽谷催携酒雲鎖立關護著書泉水  
菴云供隨鳴磬銜花鹿聲應疎鐘報曉猿懷弟云  
雁孤越覺霜天濶被大偏驚雪夜單元旦云已甘  
社樹終爲櫟却媿盤花又頌椒簡啣公山民兄弟  
云扶風是處堪施帳安邑何時始得肝漢陽署中  
云遣愁堦下尋花笑得句林間選葉書自嘲云封  
回一札惟憑雁歌不到奚啻廣平之一賦乎先生  
風流才人構想所不到奚啻廣平之一賦乎先生  
有弟字弁伯者予兄弟童子師也授句讀入關月  
日把百美人絕句朗吟密咏寢食都捐今采詩于  
其家亦無從物色之矣豈非後死之責與

同振公伯仲遊龍眠

忽聞清磬發携手叩禪關風雨差堪蔽荆榛總未刪鳥  
鳴雙樹靜僧坐一龕閒許我來相傍何須更買山

漢陽幕中寄題曼衍草堂四首

樂土今安在幽棲勝受屢雖無五畝地却有一壺天  
嶂高墉列飛泉匹練懸少文圖四壁終是假山川  
插棘環爲堵寧須版築勞天隨耽杞橘仲蔚惜蓬蒿花  
影千章繪松聲一壑濤翛然物外意只合讀離騷  
丘壑身偏稱生平願已酬庭狃肥似荇檐鳥狎如鷗積  
翠當窻綠輕烟入座浮草廬安敢望差可敵牽舟  
天肯容安隱爲留此一丘豪華知不羨烽火諒無憂羣  
得從麋鹿呼甘任馬牛得歸銘陋室何事賦登樓

村居遣懷二首

半生行乞枉衣珠歸守蓬茅老益迂賦有靈光堪教妾  
學非博奧莫嗔奴漸增鷄犬常愁放下括牛羊不用呼

獨坐林間時小酌流鶯百轉當吳歛  
後此餘生總是偷長林豐草且優游  
蕨薇不費籌車祝  
葑菲何堪夢卜求四壁圖書猶舊澤  
一簾風雨已殘秋  
丈夫自有千秋業豈必求封萬戶侯

訪山僧

獨坐蒲團曉復昏西來秘意共誰論  
一聲鐘磬穿雲出  
百轉烟蘿帶露捫欲乞金鑰來丈室  
慚無玉帶鎮山門  
看予雙鬢今何似可許皈依兩足尊

挽孫武公

回首中原事已非書生百戰出重圍  
壯心自許標銅柱  
熱血誰知濺鐵衣刁斗聲殘悲夜月  
旌旗色變捲斜暉

慚予叩馬曾無語空向溪山賦采薇

山中初度諸弟治酒酌予時有子春之戚

頻年此日俱爲客何事今朝倍黯然  
皓首一經幽谷裏  
敝裘五月夕陽前強支病骨酬尊酒  
屢啓空囊覓藥錢  
縱得餘生翻是累不須更讀養生篇

懷戴大東鮮

何日相携五岳遊得逢泉石且優游  
千章古木常疑晦  
六月衡門却似秋有句那堪方鮑謝  
絕交未敢避羊求  
幽谿不減山陰道乘興來時杖作舟

秋日送司馬魯公遊匡廬赴舊將楊羅兩公之約  
渺渺征帆向豫章鼓鼙聲裏奏招商  
花開蓮社池應白

秋到柴桑林正黃湖上傾尊深醉月林間移席徧迎涼  
爭持鞭弭追遊屐尚是山公老葛疆

代內寄漢陽

霏霏柳絮穿簾入知是春光不久稽出塞冥鴻俱北翼  
成巢乳燕必雙棲錦文織似頻年倦旨蓄封猶隔歲題  
偕老不知緣底事令人翻笑太常妻

東姑蘓璧林和尚

出處于今俱是累飄然杖錫却從容一拳室似維摩室  
四面峯如鷲嶺峯磴道高低從草塞柴扉開閣總雲封  
愁人到此聞清磬猶似寒山夜半鐘

春初送從子赤玉赴白門李香岩家塾

尚憶六朝佳麗處于今傳說盡成灰山河舉目那堪弔  
懷抱乘時且得開醉月艤舟桃葉渡尋芳折屐雨花臺  
待歸簡點奚囊句看爾登臨作賦才

月下聞簫

林間浙浙晚風生風裏招商一曲清聲漸自然終遜肉  
我非太上豈忘情驚心疑是關山笛傾耳還非緱嶺笙  
記得當年秦弄玉樓頭曾引鳳來鳴

嘲老夫得老婦

改得新粧別樣嬌祇餘眉黛待君描誤施鉛粉侵雲鬢  
洗到于今尚未消

胡代工

字子亮叅知伯玉公冢孫少穎敏能讀丘索  
之書左侍御三山公器之以女妻焉發憤成



療年十九卒于白門流寓所著詩文數卷為內兄  
左子承携去鏤版吳下未幾江南沸塘悉失之矣

懷環山

環山秀甲石屏西邨市風帘颺不齊古木懸崖蒼蘚壁  
小橋流水白雲溪野田雨足垂虹背別院春濃到馬蹄  
人去舊林空有夢一尊何處聽黃鸝

龍眠風雅卷三十八目錄  
木厓潘 江蜀藻輯  
廣陵韓日起碧滄  
同里馬繼融愚公  
吳道軾 一首  
江中龍 二首  
張克儼 三首  
吳紹志 三首  
吳道濟 八首  
厲貞 二首  
吳汝旂 三首  
戴邁 三十六首

龍眠風雅卷三十八目錄

范世鑑 四首

吳道軾 一首

陳拱璧 五首

江中龍 二首

戴閔閻 二首

張克儼 三首

李延壽 二十九首

吳紹志 三首

劉胤芳 十四首

吳道濟 八首

楊遜 七首

厲貞 二首

戴邁 三十六首

吳汝旂 三首

齊煜

二首

吳日杲

一首

龍眠風雅卷三十八

木厓潘

江蜀藻輯

范世鑑

字子明天啟初諸生少績學原本性理博通經術諸凡天官兵法識緯算曆以及水利之

書火攻之譜屯田車戰魚鹽茶馬之政皆能抉摘  
奧突披露鑄鑄不為剽賊塗澤之學尤耿介尚風  
節取事于謁與人交端重不可狎久而彌篤人無  
賢愚見者傾倒後生有一言之合乎道忻然如已  
出亟為稱揚姚司寇弱冠時曾上書數千言涵泓  
演迤先生持以示予曰此異日救時之才也其智  
鑒如此崇禎末以疾卒于旅舍士林惜之

鬢嶺山莊笑巖

舊有人行路新鋤一徑彎藤旋拳曲蓋石立自然關雨

過添飛瀑雲來出遠山林中盤礴久鎮日不知還

遊棕川古道菴

香閣捫蘿上輕筇乘興遊蒼苔迷古道野樹護林丘  
影松陰內江流天際頭如何禪定處羽客任棲留

謁朱大司農墓

司農墓枕碧峯旁老盡蕭蕭舊白楊長以一杯存漢土  
此間千載自桐鄉古碑斑駁雲猶護怪石欹傾樹欲僵  
我讀簡編如覩面又携椒酒拜斜陽

借趙又漢方奕于諸子讌集北山

遠郭蒼巖一徑迴林花經雨未全摧迢迢雲岫尊前集  
次第柴門杖底開春意却同人意醉歌聲還隔水聲來  
仙翁碁局何年迹細草枯藤剝碧苔

吳道軾

字瞻樵弱冠補諸生篤學者古為士林推重相國史公三徵不就所撰有涵鏡齋集及涉

江畏語日難錄等書

皖上卽事

三冬烽火徹郊原一望山川帶血痕帝為上遊開節鉞  
賊從江北瞰天門解衣怒馬驕盈路寡婦孤兒哭盡村  
惟有條侯真鄭重銜枚擐甲不聞喧

陳拱璧

字幾先崇禎初諸生性孤介絕俗好古力學年二十文譽斐然邑令陳公金鉉拔冠童子

科待以國士每應臺使者試輒被激賞數困舉場遭世亂抑鬱以歿幾先自祖及父皆遊鄉校有聲三世縹緲半生膏火而竟不偶命也所著詩文蕩於兵燹僅從其壻家蒐得五篇是亦昌黎之李漢矣

過白蕩湖入小官山禮祖墓二首

淦淦青山雲悠悠白湖水小聚十餘家世稱通德里良

以我先人占籍從茲始生爲皖神君歿有桐鄉祀祈報  
禿兒童伏臘燔羊豕云胡三百年豐碑亦漸圯大宗移  
官山守塚留別子忍輕馬鬣封纍纍墓巔址隧道日以  
迷不治伊何底誓將鋤去之次第剪荆杞醜酒告靈旗  
一滌曾孫恥  
端平際末造宋室久阡危西山與鶴山講學相支持我  
祖生茆塘當軸歸師資累徵弗一就心與泉石期伯顏  
下彭蠡姚許先致詞務須得我祖不得毋旋師焚山禍  
桑梓忍惜志節虧所以一麾出早卧荒江滄里人呼官  
山清白仰令儀孰知我祖意服官非所怡後嗣守耕讀  
慎勿慕華滋

清越樓歌示兄子默公

吾家十世惟讀書聚書各有三間廬我曾伯祖爾高祖  
丹黃所至就樓居特構此樓植雙桂歲與三槐葉交翠  
綈緗卷軸可三千經史百家分位置外翁曲靖方爽鳩  
來顧爾母登樓頭署以嘉名曰清越蠅蝻叢桂爲增幽  
費舍碩儒標奕葉此書詎止名山業奎光夜夜照庭柯  
產爾蒲梢天馬骨九歲作字凌右軍十三鴻筆該古今  
祇今華年望弱冠姓名已自翔鷄林噫嘻茆塘遺訓戒  
榮進子孫甘守丘園分爾生數器兼一身方池豈得淹  
鵬運况當文明極盛時隆平國步煩撐持南北交訌待  
良策會須吐出胸中奇不比茆塘在德祐大如同甫憂

南渡此書應有濟川功此樓合接凌烟路昨從樓上醉  
歸來夢見桂花開兩樹晨起揮毫聊致語

喜門人江葦渡入泮東尊公峨嵋明府

雨餘初攬泮芹春綵筆文通夢有神每把乙藜占虎氣  
欣看尺木動龍鱗書馳灑瀕風千里人對峨嵋月半輪  
遙想蜀民稱賀日為言茂宰似蕪洵

讀家默公試牘

小戰驚從壁上觀八公草木望秋寒文心韓愈通元狩  
詩格陳思壓建安徐引天人應造郝詳陳表餌欲登壇  
相期努力三年事盼爾雲達刷羽翰

江中龍

字鱗一天啟間諸生為文幽異峭古自成一  
家與方爾瞻維石何應珏待卿結社南溪深

思孤詣傲然  
不可一世

白門午日喜晤戴東鮮

乘流匣筑傍西州天濶占星望斗牛我已倦遊慚立鶴  
君來擊汰狎浮鷗新江花柳薰風老故國漁樵暑雨稠  
連日愁心同屈瓠相逢聊復慰三秋

無題

唾餘豈欲浣時流郢雪隋珠遍十洲門徑獨能方仲蔚  
琅玕幾度失王猷寡知自笑雷聲滿想像多從月影投  
冊府邊籌新水事三千聊擊海飈秋

戴閣閣

字式其邑諸生儀部梳河公之子  
少孤能自振經學通明卓有時譽

感遇詩

天門北去有長川遊子傷心往事牽策憶仲舒三獻早  
詩慚常侍十年先豈期河朔堪逃暑且渡江東學刺船  
風駛定知催鷁首莫教離索對晴烟

冬懷

江城流寓老風塵歲暮嚴寒逼隱淪司馬家貧甘滌器  
伯鸞廡下恥因人但看梅蕊常懷孟豈有桃源似避秦  
埋炤滿拋沾薄醉離騷快讀莫傷神

張克儼

字子敬崇禎初諸生天姿雋朗爲文溫雅醇茂所交皆通人名儒年二十四早卒與從弟子猷皆負才名而先後不祿若符徽獻士林惋惜所著古訓集石城李居仁止爲之序而傳之妻姚氏侍病割股肉以進一七而愈再進則不可救矣矢節三十餘稔祀列女祠

燕

不厭僧寮舊銜泥上下梁點波雙剪濕帶雨一芹香夢  
逐梨雲冷語隨春晝長寂寥欣得爾來太未能忘

秋日別友

客從此路去秋色正凄然可怪別離際偏驚風雨天空  
山迷落葉野鳥入孤烟立久寒衣薄憐君復自憐

玉屏山房偶題

綺語緣深懺法王久無春夢逐風狂竹侵坐石棋枰冷  
花釀流泉硯水香僧不放魚因鶴瘦蟬難釋字爲仙忙  
鄴侯自具飛霞骨鷄犬勞勞歎下方

李延壽

字仲山家于邑之樅陽好犬言任誕自放嘗一試童子科不售卽棄去經生業以詩詞書泐遊公卿間臯城徐月鹿銓部特異視之延爲記室無何客死其家銓部公厚殮以歸錢子飲光爲

音耳 卷三  
詩哭之云之子吾鄉秀樅陽汝最奇狂言疑薄福  
多藝怪無師死仗故人殮生憐稚齒飢不知去婦  
篋留取幾篇詩亦不  
略見其生平云

虎丘中秋

客遊時節易蹉跎忽值清秋吳郡過連日雨餘今喜霽  
中天月好奈愁何堤邊萬舫如相約石上千人不礙多  
醉裏却迷歸去路滿江燈火送笙歌

西鹿邸中人

清醑入市未能賒且就僧寮自煮茶累日有緣連草榻  
十年無喜報燈花窓前寒色山間月枕上秋聲夢裏家  
此際若非兄弟共寂寥誰念滯天涯  
不烈內子長齋禮佛喜賦

解珮除葦向佛前也知煩惱太相牽鉛華未老還甘謝  
羅綺雖貧尚可穿祇爲發心求渡筏願祈出世早登蓮  
不然野藿同餐久何用長齋太學禪

寄懷方子詒中翰

君服拖朱我髯華地分南北各天涯鳳皇池上神仙侶  
猿鶴山中處士家千里暮寒飛白鴈半籬秋色老黃花  
何時更得雲泥合尊酒論文逸興賒

分鏡詩贈美人行

玉鏡今朝欲破時樂昌當日最傷悲本教雙鶴窺同舞  
却許孤鸞影各隨白首尚須憐短髮綠窓猶賴畫修眉  
莫令誤落他人手長使分開無合期

哭方子留

海上魂飛實可悲，相將那復盡交期。何須定學顏回壽，却恨難傳思肖詩。如此同心天下少，重教刮目世間誰。惜君未見予新句，燒向墳頭倘得知。

過惜陰亭同陶羽文坐竹下有感

少時曾借作宮牆，此際俄驚鬢染霜。古廟未頽遺像在，舊遊重憶幾人亡。生徒近日延高座，過從閒談愛老狂。三十年前數竿竹，清陰猶覆讀書牀。

平江舟中雜詩四首

潮漲平江兩岫寬，初曦衝霧上林端。心驚節候更容易，日計程期進屢難。村靜鷄鳴桑樹曉，寺荒犬睡竹籬安。

西風浙瀝吹雙鬢，溯轉清流見小巒。

雲帆漸喜近金閭，何處園林問辟疆。一座好山看入畫，萬株高柳數成行。過橋花市通香水，賣酒人家住半塘。多少吳儂歌子夜，客心纔聽覺悲涼。

秋至方經數日新，勞勞行役負佳辰。野花歷落閒過目，烟水微茫近逐身。唱曲成雙隣估舶，采菱作伴隔溪人。忽思孤影雲鬢冷，刀尺今宵暗損神。

不須蝦菜與蓴羹，領畧多堪慰旅情。佇立但聞香過太，相看每在櫂逢迎。蒼波怪石翻鷗暖，白日游絲裊樹晴。薄暮更携餘興往，瓶中貯得惠泉清。

感述



花發長教負好春黑頭今見雪霜新江湖有興遊無具  
藥餌難求病在身睡穩却嫌呼米婢詩成猶有索書人  
年來事事多屯蹇贏得癡狂惹俗嗔

呈某都閩

一生任運最艱辛潦倒風塵剩此身人每憐才能恕傲  
天還與健爲償貧讀書猶不求科第學稼終難遂隱淪  
病木陽和如再遇勝他桃李十分春  
早春訪潘蜀藻不值雨中柬懷

揚子貧來更屬文蕭條門巷鎖春雲故人到此曾相問  
闔者何因不使聞欲就清光銷鄙吝恹衝泥濘待斜曛  
左家壁上新詩好也當從容一見君

題左子厚噉椒堂

擾擾紅塵俗慮煩君棲北郭幸無喧乍看華屋新居好  
云是先人舊澤存額曰噉椒姚老叟饑來乞食李王孫  
因之重感當年事嘗膽如今不易言

噉椒休那先生所額也

寄汪平子

去年七月金陵別消息中間兩不知舟過虎丘惟見石  
客來鴈汜祇傳詩山邊雪下梅開早江上君歸我到遲  
莫負秋風好涼夜一聲長笛使人思

將赴六安途中先寄徐月鹿銓部

春明馬首杏園回爲寄殷勤到水隈知己尚無忘故舊  
孤征那敢復衰裒青山著黛衝泥過紅樹如花夾路開

豫想涼風吹綺席定應懽接野人來  
春田六安道中遇雨信宿田家  
荒邨底事苦淹留地主依依稍解愁  
携罾捕魚供遠客  
犁田趁水駕耕牛坐看雨脚深林斷  
起望山頭宿霧收  
臨別牽衣童稚熟王孫一飯幾時酬

西湖雜咏四首

湖畔春來似錦園清波盪漾靜含暉  
魚潛密藻吞僧飯  
風引幽香上客衣山鳥尚啼當日恨  
藕花猶歎主人非  
那堪臺館俱頽謝華表應無遼鶴歸  
沿湖楊柳種初齊下有青青草色迷  
車過渾如鋪碧毯  
風來依舊轉黃鸝清詞直與山分韻  
屢舞常教日欲低

爲說杭州蘇太守昔年遺愛在斯堤  
仙刹居然出世氛浮屠靄靄入青雲  
徑邊拂石千星落  
檻外窺天衆象分昏旦湖山變氣候  
陰晴草木換情文  
上方寂寂惟鐘磬不似中流載酒醺  
橋通山麓會諸源須信雲中別有邨  
孤艇偶因風送至  
密林但見鳥爭喧青蒲處處抽新葉  
綠水家家到小門  
我意久號泉石癖過逢可許坐層軒

別西湖

戀飲離筵日欲晡杭州作底足  
懽娛山邊金谷何殊石  
曲裏嬌娃本姓蘇白首幾時還  
再到青春此地忍相孤  
臨行無限低徊處易別人情難別湖

訪慈慧上人

楓橋臘月別袈裟為許今秋看晚花手種青松收舊甕  
時當白露摘新茶慈航約赴來無爽道號逢人問總差  
一帶樅陽魚米市蓬蒿滿徑李生家

別胡有自

我已窮年作腐儒君猶挾策授生徒湖邊鰕菜同餐久  
海內文章欲識無花發短牆閒借看客來疎竹遠相呼  
可憐三載如三日此別悠悠會面殊

寄石逋

風雅調孤千百載苦吟偏見老夫身自知此道誰能和  
不信吾宗尚有人客館月明歌滿耳霜江楓落淚霑巾

何時再得相酬唱令伯多君我更親

五十初度二首

却能力疾尚高眠知足時時豈怨天有興詩成真快意  
無營心靜即安禪冷炊端不因人熱寡過還須加我年  
眼見商瞿猶舉子此生幸免負三千

青山四面擁幽溪緩步躋攀信杖藜居室幾更如蜃市

此身何處傍烏棲當時生我無皇覽

先君以五月見背予以九月始生

今日成人感母携

先孺人苦節撫育教訓二十餘載

可惜百年銷已半

回看海岸正昏迷

薦新

貧家今日始嘗新二簋方登淚滿巾客箸每常先厥祖

豐年猶自後時人學書難及襄陽帖乞食甘爲粟里民  
如此艱辛還可獻寢園不薦十餘春

吳紹志

字季先大叅皖山公之曾孫通政石蘭公之家孫也以祖蔭授河南彰德府通判遷懷慶府同知皆有惠政入爲尚書工部郎出知廣西南寧府使交趾時交患水災訊之乃水蝗爲祟公爲文處禱蝗息水退交人立祠繪像祀之所著有廣巖齋集子國珙總戎贛州身殉國難于公有光矣石蘭公諱自啊有詩集失傳

偶興

十五女兒髮覆肩獨坐深閨春思牽小園花發方新鮮  
輕風送蝶上寶鈿日暮下階何便嬾花間微笑蹙金蓮  
采采盈掬向母前阿母愛花增女妍也將花枝插鬢邊  
色衰花艷兩堪憐女兒睨視意悽然人生盛顏難久全

何如花發自年年掩淚歸房卸朱鉛羅衫半鞞髻半鬟  
香銷燈暗不成眠徙倚檐前看月圓

投少林寺

傍溪尋古刹驅馬恣閒遊遠樹暮烟直亂山殘日浮疎  
鐘磬梵唄微雨點清秋緇衲遙相迓禪床且暫留

渡河

積陰今忽解霽色漾河流水漲疑無岸風平恰送舟中  
年徒躑躅三郡屢淹留最是驚心處哀鴻集滿洲

劉胤芳

字未沫號白林廷尉清水公之弟也壻篋唱和時人比之二蘇十九補博士弟子稱諸生祭酒久困場屋遂棄太帖括含咀風雅宜典路宜卿選入詩史中所著次醉齋稿不下二千首以疊遘兵燹僅存什一年七十隱居大龍山鄉里德之比歿有感激泣下者

咏史

相如罷車騎高卧秋風時門掩茂陵草夢繞上林枝寂  
寞竟何事歲月忽已馳賴有長門賦能克取酒資

小山館

黃鸝雨後來睨睨在高樹庭陰鹿養茸屋角鳩呼婦賞  
心非有待因物自成趣濠濮宛在茲華林復何處

夏夜米氏園燈歌

米燈天下奇觀也海淀園芙蓉千頃樓臺錯其  
中景寓於燈客有請寓目者使君於夏夜燒之  
醉而作歌

七寶合成月萬花攢作燈燈來月自照燈去月重升古

來燈月不常好有月無燈月空皎君家海淀燈最奇一  
天皓月人間少此時海淀月似照玉京水月色映樓臺  
芙蓉濯清泚見月不見園園花空的歷對月更燒燈花  
自燈中出花燈寶月一宵并海淀園林入眼明恰似開  
元花月夜雲中遙見廣陵城

竟州刺史行

李卓吾先生以副憲祝髮黃州頃聞沈太守琬  
復解組棄妻子太竟人留之不得感而作此

溫陵先生金帶圍倦來一繫比丘衣把茅作活蓋爾爲  
揚眉瞬目流清機先生於世良悠悠一身萬里猶輕舟  
何如竟州刺史百不憂東方千騎居上頭男呻女吟苦

死留如花刻屋翠黛愁一朝却走青岩居竺度不報茗  
華書功名富貴敝屣如萬夫牽挽無停車吁嗟乎二公  
神龍矯矯翔天衢下視沙界如羣豬

懷方嘉州潛夫

之子三刀夢嘉州萬里行舟過神女廟花入錦官城杜  
宇千林合峨眉片月明此時端手版從事恰相迎

忽憶故人五十賦寄

故人天下士五十尚青袍何日逢初度多年已二毛林  
花山路澁岩月草堂高不寐思瓊樹無由寄鬱陶

同方爾止密之過白安石齋頭

流水繞門西壺觴高復低花殘留紫萼樹密隱黃鸝對

酒休辭醉看山且杖藜莫愁歸太濕春路不妨泥

春遊

郊西流水處楊柳間桃花裊露幾枝好縈烟萬縷斜流  
鶯啼密樹飛鷺下平沙不淺明朝興重尋賣酒家

寄謝中隱靈泉蘭若

山人不作方中戀布褐春隨開士居半榻香雲初地接  
六時清梵萬緣疎當杯濁酒容乘興照眼濃花好著書  
老我別來蕭索甚高齋夢蝶正蘧蘧

出塞

寒烟落日□塵飛畫角纔吹淚濕衣紫塞黃河千古在  
賀蘭山下幾人歸

送路大叅宣卿還宜興

白鷺洲前楊柳枯清江日暮一帆孤縱然不見楊花落也寄愁心到五湖

別文姬

潮來湖畔水痕平不分通舟送遠行莫道相思似潮水有時還退有時生

送汪君酬之湖陰

幾層孤塔俯江濱客裏追隨忽又分倚檻不堪頻眺望片帆一櫂入寒雲

別爾止

誰道相逢慰別離不能成喜反成悲明朝爾挂孤帆遠

我亦衝泥馬太遲

吳道濟

字汝楫一字周萬弱冠補郡諸生與兄道觀有郊祁並美之譽崇禎壬午中鄉試副榜篤學淳行教授鄉里能抗師法事母色養備至尤為人所難久次學宮將以明經貢于廷先期早卒士論惜之

皖邸有感

皖口徵文日中原鼎沸時于家聞野哭一劍倚身危太國還懷土登高漫賦詩祇愁劉刺史長嘯不勝悲

小年夜

孤懷驚歲晚此夜倍堪憐酌酒聊從俗思親不忍眠音書憑間道信宿老江天何日櫂槍淨呼嵩祝萬年

元日雪

不是山陰權如何雪滿樓擊空聲細細撲面覺颼颼鳥  
鵲迷歸浦山川著素秋老農占歲稔一語破離愁

皖江抵仲兄寓

風起天纔霽因登皖伯臺吾兄江上望有弟賊中來道  
路經冬雪悲懽此夜杯欲前還彳亍乍見恐疑猜

迷樓舊址

也曾樓閣倚雲霞故老相傳帝子家複道恩光霑腐草  
昭陽日影照棲鴉銅駝不下三年淚銀剪空裁四季花  
興廢祇今憑眺望江山可認舊繁華

暮春送友人南下

桃花雨落水東流太太江天一望浮曉霧鳴榔迷古驛

春風彈鋏信扁舟卽今故國妖氛滿可是鍾陵王氣收  
爲語僑居陶謝手新詩好載仲宣樓

九月十四日同友飲醉月樓因贈其主人陶翁

燃犀山下葉颼颼有客狂歌古渡頭邂逅青山能作主  
招呼明月却當樓天門霧宿千帆影牛渚風高萬壑秋  
可是相逢重九後君家叢菊尚風流

同友人舟行大雪

水色天光一氣浮大江如沸擁歸舟千山玉樹臨風立  
兩岸銀河夾霧流虛擬梅開何遜閣又疑月到庾公樓  
清寒此日惟君共典酒前村有敝裘

楊遜

字嶰谷自號天山子述古先生之季弟也家貧采相養親不治舉子業晚築室山中蓄花



樹取果核鬻以自給嘗遇雪累日抱衾兀坐如  
枯株不出于人其爲詩清而不瘠亦有可誦者

### 咏史

蘓武持漢節不屈志何堅牧羝待乳生遂經十九年饑  
餐天上雪渴飲石中泉雖然歷險艱至今稱其賢

### 憶亡妻范氏

偶爾簡空箱留得一疋素執素憶其人含情欲誰訴縱  
得工縑人未必能如故

### 贈李德林先生

蒼顏老子有詩相短髮長鬚倒曳杖不駕安蒲隱茅茨  
只貪醇酒愜高尚春花落盡秋蘭芳幽谷無言祇自香  
微風引入棲玄閣歌罷新詩一舉觴

### 茅齋初成喜友人見訪

茅齋纔落罷有客共徘徊一水千回繞羣峯四面來沿  
溪幽草出傍石野花開他日迎新燕期君再舉杯

### 寄友人

聞道君家築草堂想應梅竹覆東墻睡殘午夢黃芽熟  
敲就新詩綠醕香馴雀穿花喧日暮遊魚戲藻引波長  
年來飽得山林趣未必君狂似我狂

### 雪山小景

雪現遠峰畫意雲歸幽洞詩情寒鴉幾點枯樹風來欲  
定還驚

山家夜飲歸途口號

山家斗酒醉山翁  
醉裏消閒百慮空  
夜靜歸來猿作伴  
半天星月一溪風

厲

貞

字羽元隱居有志節方子子安為子稱之

簡友人

深谷松千樹寒塘水一灣  
翠微依石屋蘿薜繞柴關  
丘壑餘生計風塵壯士顏  
含愁忽成寐鶴唳滿空山

春日以詩代柬招徐公悅

忽憶論文友山中正索居  
欲將春社酒共讀古人書  
明日掃花徑相期過草廬  
貧家何所有君莫笑無魚

戴

邁

字樂叟自號三借道人性疎放豪邁不可羈縻繼三爵之後議論蠡湧雅謔迭奏舉座為之傾倒于一切世事泊如也好讀書嚅嚅墳籍輒能涵攝囊括晚年授徒自給益困踣不振年六十餘

卒無子人咸惜之著有漫興閒吟諸集李子石逋屬予校定采其最者若干篇

預書絕命詞

我非彭祖年安得久我即彭祖終當回首苦海茫茫一朝撒手哭我無人笑我有口我已行矣何分好醜

明知

明知有一歎未歎且復樂有書且復讀有酒且復酌好景恣遊詠好友恣歡謔此身在塵寰不過須臾托今人漸凋喪古人不復作嗟哉無知輩皆為名利縛矻矻不肯休脩短難預度譬如少水魚漸漸日就涸一朝續息定孤墳何寂寞

夏夜咏懷

月在紙窓明月落室若漆蛙鳴不肯休莎鷄更唧唧四  
野間無人獨宿領蕭瑟輾轉望天曙夏夜如夏日

幽居五首

淵明不求解我則不求記閒翫樂餘年雙目受其利所  
恨居窮鄉未盡千古異安得三十乘死生不相棄  
不飲神已枯縱飲儀已喪惟值半酣時身心自閒曠賢  
聖名匪虛功德頌豈妄必如大聖人而後可無量  
古來善書人鍾王稱法律多少臨摹者亦不入於室技  
豈在承蜩射豈必貫虱我雖不善書自有我之筆  
孤身對孤月應知月亦憐一月圓幾夜一歲幾回圓月  
圓猶有時人孤已多年何如無圓月長夜暗中眠

我本老來人晝睡更難已忘情污與雕朽糞甘自擬拂  
意事紛紛一睡便忘矣料得長逝餘酣適亦如此

月下對酒邀竹中泉下諸友共酌

孤居半載餘賴爾相爲友月下空徘徊時愧獨傾酒頃  
邀與同歡魂魄有知不生前肆飲宴此際羣緘口疎竹  
冷淒風流螢定衰柳遲爾爾不來淚下欲盈斗今猶感  
慨生異日終當偶不識予何人姓戴字槃叟

偶成

蘇州倣彭澤中郎倣東坡我自用法何爲苦學他情  
於靜裏得景向眼前過花鳥聲色異風雲變態多

獨酌歌

獨坐無聊已覆被忽聞酒來躍然起把盞獨酌還獨斟  
面帶微醺亦可喜飲罷古詩重展看嗜酒無如陶與李  
我雖不及古之人欲破窮愁聊復爾試問酒中趣何如  
我亦難名其所以

喜晴

夜醒危復雨晨起幸朝曦宿友重逢日奇書乍得時商  
量燕語壁奔赴鵲銜枝又聽農人語春寒尚可疑

早起

鳥聲催枕上起眺意欣欣松老偏宜雪山高不礙雲遠  
泉穿石落野火隔宵焚對此清凡慮無勞謝世氛

偶閱陳眉公酒董茶顛率爾書此

茶掌秋兼夏酒居春與冬百篇遜李白七椀過盧仝善  
飲東臯子能烹桑苧翁斯人如可在滌器願相從

山居雜咏二首

素有泉林癖都無名利貪含情培妬母帶怨種宜男是  
石堪容拜無山不可談黃鸝時刻轉那用費雙柑  
春到花爭勝荷鋤手自移竹披君子翠松老大夫枝有  
伴同呼酒偷閒自課詩牡丹開卽落富貴幾多時

讀書咏

老來何以愛山居寂歷空齋好讀書水助伊吾鳴澗底  
鳥驚吟咏下階除不求強記情無繫斷却名心福有餘  
三食神仙慙老蠹山靈應笑不才樗

七夕有感

今宵秋思在誰家  
望斷清光一倍嗟  
有巧難求甘拙守  
無衣可曝畏寒加  
疾雷古屋驚藏鼠  
密雨空山隱暮鴉  
回憶昔年相聚日  
雙星坐對意無涯

贈迎龍菴老僧

老僧本是閒中客  
更向閒中得最閒  
歲老不知成皓首  
坐來獨自對青山  
心光朗朗花千樹  
性地如如月一灣  
堪笑嶺雲閒不得  
幾番飛去又飛還

答友

梨雲夢渺恨年年  
窮到床頭斷酒錢  
敗葉欲飄鄉思碎  
瑤函忽墮友情牽  
披從冷砌鶴窺字  
讀向西風菊解憐

近况蕭疎那可問  
報君只有舊時顛

歸桐感懷

歸來生事有誰憑  
歲暮衰顏百慮增  
無室無家仍是客  
不齋不佛久如僧  
肝腸欲訴尋知舊  
形影誰憐託夜燈  
性本孤清時更變  
遙期弔客借青蠅

予久客歸桐韓五弟贈以長言走筆步韻

久棄繁華若棄塵  
客雲旅月伴閒身  
艱難世路休言貴  
羞澁囊頭自愧貧  
偶憶昔年如隔代  
乍逢知舊若新人  
浣花卜築期終隱  
須仗裴郎數十緡

雨潑巾壞

午餘攤鉢興方濃  
驟雨傷巾足惱儂  
酒似漉來過靖節

角雖折盡愧林宗思彈不得情空繫欲挂無能恨溢骨  
應歎儒冠久誤我却教露頂任疎慵

和萬紫函感時之作

兵戈蹂躪幾經秋遯跡深山絕世求謾擬雪中披鶴氅  
惟思灘上著羊裘聽笳莫向賓葵館望月休登鎮海樓  
南北紛紛俱不問酒酣歌罷自搔頭

七夕山中有感

虛擲年華又七夕幽棲岩谷已三年人於老至偏多感  
山到秋來倍可憐蘭苗始萎旋吐桂鶯歌乍歇忽鳴蟬  
光陰迅駛堪惆悵誰望雙星雲漢邊

述懷口號

年來年去自年年鏡裏誰知老態添但得安心便是福  
若能閉戶卽爲仙爭他名利何時遂想到兒孫那得全  
趁此鬚眉具一世早參生死大因緣

閨情

十載深閨祇自憐蛾眉畫就負嬋娟梅花落盡尋常事  
不爲春歸恨杜鵑

聞蟬

小窓亭午乍聞蟬日烈風輕響易傳又是一番新聒噪  
綠陰深處惱人眠

秋夜贈案上菊

移爾置之筆研叢且收傲骨讓西風雖無綠酒拚沉醉

也把燈花添夜紅

咏菊

霜姿不為繁華改傲骨寧甘流俗輕三復落英多楚怨  
一生知己是淵明

竹中諸賢

翠竹森森幾度春其中安置百年身當時一霎氣猶在  
俱是奔波名利人

中秋對月

雲淨天空鴈陣寒置身如在水晶盤可憐孤館他鄉客  
霜鬢年年祇獨看

讀書嘆

一字不知真是福萬言日誦總歸空焚香默祝來生世  
耕叟樵人並釣翁

憶周文止二首

清才雖死訝仙逸天遠玉樓勒彩筆記得哭君河上墳  
雪深三尺没人膝  
十年笑語散茅屋夢裏驚君敲砌竹何處相知最斷腸  
遺書零落無人讀

隱居言志

杜生愛吞百隻蟹何老欲買妾滿屋腐儒齷齪拈鬚笑  
架個書樓睡個足

吳汝旂

字隱招號鯉石博學好古至老手不釋卷性  
耿介與物無競鄉里以長者稱之年九十餘

卒自稱瓜山遜者  
所著有瓜山集

### 菊月朔日壽家公著六十

南雍丈人何所有拓落青山一杯酒南雍丈人何所娛  
倒迴白眼一床書青山白眼兩相得富貴浮雲各自適  
支遁心腸悉達身維摩鼻孔尼丘脊如今世態趨炎熱  
羨君肝膽飛霜雪如今交誼中路衰羨君終始堅金鐵  
人世榮枯何足論古道從今炤顏色君不見東方桃實  
安期瓜都向君前供歲華

### 面壁誦經

碧眼胡僧曾面壁我今面壁在樅江洗心但誦經三卷  
閱世猶存眼一雙座上誰堪尼父鐸塵中自有法王幢

晨鐘暮鼓如常在何必山僧夜擊撞

### 悼季子紹訥

頭戴夫鬚草身披襤褸衣日斜猶未返慈母倚柴扉

齊

煜

字中立弱冠有才  
名崇禎末早卒

### 月夜行舟

曲曲寒江路迢迢遠客情雲開霜月小風息夜潮平清  
興思宣子孤懷憶長卿萍踪何日定愁聽塞鴻聲

### 旅寒思歸

發發寒風吹我衣遠江孤客冒霜威朝朝悵望魚書至  
日日悲看鴈字飛夢裏故園千思擾愁中羈旅萬緣非  
前簷獨步行踪寂漂泊何時權北歸



吳日杲 字漢章官廕生中翰潘菴公之弟

遊浮山

誰道蓬萊仙境賒  
名山浮水似蓮花  
欲看雷鯉烟霞句  
似泛張騫月夜槎  
綠樹文禽添古蹟  
複廊深洞有僧家  
不知棋畔人歸否  
猶見雲飛谷口斜

龍眠風雅卷三十九目錄

木厓潘 江蜀藻輯

閩中魏 憲惟度 參

同里馬教思臨公

吳德操 六十首 方其義 五十六首

吳詩... 卷三十九目錄

龍眠風雅卷三十九... 木里... 同里...

龍眠風雅卷三十九

木里潘江蜀藻輯

吳德操 字鑑在號鳧客才氣橫放

詩古文光芒氣談擘擘逼人

所與交皆慷慨

用世之器目直上視氣勃勃

狂生目之不顧也南渡後以諸生仕至大理丞多

所建白其為詩援据該博上薄曹劉下躡何李有

牢籠今古之槩惜不多傳僅得北征

草與過江集所載者百餘篇而已

東門行 露瀼瀼非陽關多戎裝 揖我數故人 驅我僕馬  
當路傍 腐鼠嚇鳳雛 饑鳥啄人腸 鳳皇自謂安之朝  
飛暮宿 徒迴翔 徒迴翔 欲集高樹無枝下 瞰海外無  
梁刀鳴 箭中流水 湯湯千里 萬里何其長 刀鳴箭中

流水湯湯千里萬里何爲長從此著柳襦入都門望故

鄉解四 帝封國既 封國既 封國既 封國既 封國既 封國既 封國既 封國既 封國既 封國既

當悲歌 悲歌 悲歌 悲歌 悲歌 悲歌 悲歌 悲歌 悲歌 悲歌

父兄當爲廉節子弟苦于飢寒一朝得罪赤手何容黃

金可結人何必以廉貴殺人可取錢何必厭酷吏

對酒

騎馬走城東不交卿與公公卿顏色賤但畏霍家子都

面霍將軍劍履方登殿當復思秦淮酒樓中有劉生人

人稱東平手劍安之徘徊夜鳴嗟呼江以北淮以南漢

沔間幾千里孤兒單丁寡女無父兄乳虎之怒哮西營

謂劫掠孺聚爲降兵不如對酒吹笙今日安坐明日直

承明或云有書萬餘言願獻陛下不必知名正色奉土

鳥生

鳥生叢桂樹雙翅飛入端門樓惜我端門樓中林木沉

密有人拖玉搖擺長秋以金爲彈銀爲鈎出入挾彈丸

惜我鳥死鳥子聲啾啾阿母尚在淚下不休阿子飛不

得上仰天嘆息託報仇惜我堂前乳燕雙雙棲乃在人

間銜濁泥曾不知黃雀在深林中羅家尚得射殺烹之

鴻鴈自以爲塞北甚苦吾來中道相遭分離惜我蕩子

逐彈無還期又見杜宇鳴且悲骨肉不自啄滿眼身孤

羈萬事反覆哀痛何爲

董逃行

蓬萊之山與天連仙人端坐樓居前路絕不可攀欲駕  
長虹爲橋但見海水風激蕭蕭解一督工造木蘭船沙棠  
爲橈繫置崑崙巔高望紛翮但有山木猿狖相踳躓解二  
何知採藥不可得多太少還或溺于鬼神福命心所煎  
安得鷄犬舐鼎飛來騰上天解三傳教諸公且看駕車乘  
馬還長安生女作后子爲侍中官天公愛汝賜金錢獻  
此錢世世加冠解四何必神仙然後萬年家世王公大人  
賣官鬻爵不貧醉飽樂過千春望陛下永結婚與姻

淮南王篇

淮南王不自尊賓客車馬克前軒吾將舍爾從八公黃  
金爲闕天門中天門中中何食搗藥一丸化五色奉上

天子壽無極臣服四夷聖皇哉南遊閭闔門觀玉臺觀  
玉臺乘天馬徘徊無人樂不可下人生富貴若不足學  
得神仙作舞曲

善哉行

來日大難憂來千端出門遇雨炙火不乾解一相如得婦  
志在高官自滌酒器有何喜歡解二汲井之綆可以斷幹  
伯夷覆舟人人心酸解三負薪入市饑不可餐行過會稽  
太婦難完解四人亦有言沐猴而冠斑斑猛虎與之盤桓  
解五我無衣裳以禦冬寒築室路傍愧彼曹瞞解六

詠懷二首

夜犬吠深巷晨鷄鳴高樹殘夢斷不全平生誰與訴年

齒三十餘被服舊韋布父母生我時親戚賀魁梧望我  
大門閭祝我光墳墓五歲入鄉塾從師受章句十歲能  
大言膝下草詞賦蛟龍善作波頗爲尺水誤運命安可  
知忽忽蹈遲暮咄嗟失意人貧無親戚顧北土委柴荆  
喪家那得住大人五十餘餐飯不如故阿兄困紙筆小  
弟尚懷乳自恨不高冠又不能窄步鹿鹿山水間強顏  
怨霜露杯酒發我狂衆人嗤無度胡不埋姓名輕薄自  
卑汗貪財結惡少空中以行路偏側徒區區何用五石  
瓠

淮南好文采乃以得神仙服食煉藥餌輕舉有遺篇嗟  
汝世俗人迷惘何拘牽年命日以邁感迫難少延奄此

明月光浮雲飛上天雖有好容色失意相熬煎灼灼青  
藍花龍蛇當我前傳教取玉梓上謁高山巔寶器不敝  
篋怒馬不斷鞭仲連義辭爵千載稱豪賢

門有車馬客行

門有車馬客言自故鄉來故鄉千萬里遠望無高臺天  
下方好亂太白正南災整衣出見客僕馬何虺虺丈人  
且寬坐斗酒洗塵埃家中見阿誰尺素手自裁君家婦  
在堂日夜望君回上有小印緘中寫長不歸相見日以  
澗絲髮日以飛男兒不念家無問瘦與肥明月投君懷  
隨風生光輝灼灼河漢間詎知會面稀當軒理促柱懼  
驚鄰婦機

少年行

都亭望宛雒行行過莊尠雜沓好身手蕩子幽并兒千金得名馬寶裝爲人騎關弓挾大彈中雀烹爲鼈烹汝告烏鳶啄肉無已時還脫金錯刀赤手格狐狸製錦當市中且爲豺狼悲利劍齒腐肉黃麻變青絲西北黑雲上日脚橫旌旗駕車使麒麟中屋鳴臬鴟占者云不祥主人當爲祠張樂在大野臨以迎神辭少年挾彈過走馬射殺之一臬作人語惡聲汝莫嗤遊戲白日間不辨殺人誰

放歌行呈石齋先生四首

枯桑連樛櫨夏屋怪棟拆置之當路衢黝黝生枝節榎

楠豈不嘉植根周十圍摧之爲柴薪炊爨揚灰飛昔我遊瑤臺攀麋炫袿襦嫋嫋嫋姿蹇步自趨趨暮宿北邙山高者塚與墳曉日臨灞池冠蓋屯流雲西北厲颶風蕭蕭路傍柳天馬見黃犬不願龍爲友參牛牛易馴畫龍龍易波率藕植修阜孤鴻落危柯入地伏土間上天不顧反遊子登孟門下視羊腸坂氣貴觀谷不喚不素絲雜卮茜蒼黃不可知赤日當西陸浮雲變爲緇魍魎向我號左右相屑涕亦有東家兒不能事夫婿嬌羞雙蛾睂鬢髮插翠鈿男兒號冠玉未必知可憐譬彼韞上鷹飽食烏鳶肉失意卽颺太燕雀巢空屋糠粃莫苦饑藍縷莫苦寒素絲若常白安用百千端

舉手招神仙悵悵不能語天門一何高翔駝降北渚附  
耳長發嘆服食何須多樓秀乃却步魍魎登嗟峨不見  
河漢水滂沱激怒濤西山有獵夫飛罕空悲嗥爾龜不  
我言豈能信鷄卜駕車上太行腸中轉輪轂關蜀雖險  
峻視之如表曝河朔自平曠畏之如九折僦甌與璠璣  
委棄大道傍或遂沉泥淖或以襲重房貴賤各不知不  
如鬼蜮好焉能學搗藥負擔求奇草  
橫門遇女子東隣良人婦萬里事邊關孔武揚豹褻摻  
摻夜縫裳豈不樂膏沐絕塞坐上頭君次能擊筑福或  
重於地文繡被虺虺禍或輕于羽掘獄得怪哉種豆不  
成箕治田不薙草壯女嫁征夫孤兒當遠道齧郟蹶康

莊老大傷遲晏咸陽賣酒兒多錢復善算有妻業屠沽  
世居橫門東捐貲據路津復能薄三公

入都門作

褰衣得繩紐利劍不在手上視城頭鳴白鳥大兒得罪  
小兒口我來夜渡桑乾河遼海重關漁陽多健兒橫槊  
青驄馬腰間羽箭還爨歌華闕中天棲金爵別風噍噍  
浮雲薄莊達館宅繳長蛇招要雜沓公侯家齊童趙女  
立廊廡七盤長袖能楚舞市井倡優被繡文黃口烈爵  
在勳府昨日諂事魏其與灌夫不如武安門下爲家奴  
武安家奴可殺人布置權要當路津睚眦輒敢弄白日  
借交構陷先告密東來道瑾多死亾盜賊誑曩何足卹

都亭塵起輪莫埋望見董賢翠蓋車呼來耽耽猛虎嚙  
豪賢媸媸嚴謹要金錢父兄貴侈致千萬子弟黃金白  
玉相勾連安用左右東方戟橫插雙貂入兩掖上殿有  
瑟不得鼓下殿從軍裹馬革馬革何其苦少年肆訕侮  
鼯鼠技盡爪牙爭摧頰毛羽憐狂生葛帔練裙雜紈袴  
世人怪我能濶步我欲向城東當壚無黃公我欲問朋  
友紛紛車馬不可數我欲仰天搔首指青山浮雲蔽之  
難以還我忝狹斜見好女顏色頗不足風俗固當怒已  
矣狂生勿悲歌悲歌聽者當如何咫尺不得見天子狂  
生之歌且已矣

擬行路難三首

花落東西吹乘風不上墮濁泥泥濁日以遠撲塵飛上  
天落花旦旦無時反君不見阿嬌金屋姿誰信長門寥  
落時君不見平陽盛歌舞阿兄人奴尚公主  
上山紫雲覆下山百鳥翔掘地得遺卵雄者爲鳳雌爲  
凰世人嫌此羽毛文彩異不如韝上蒼鷹復解事雙雙  
未能飛籬邊簷下將安歸將入鷄羣啄餘粟不食旣不  
可飽食憂其肥  
汲水上山巔覆水落山底大河星宿來瀉入平地漲不  
止黃鵠飛入建章宮有人從之挾彈子晶晶太液池水  
深一彈卽投洪波裏曾聞東方避世金馬門據地龍蛇  
豈得巳斯時建造通天臺仙人之掌高不可擬雒陽良



工鑄金莖上有玉盤承露美且旨道傍渴死乾封年長  
卿文園病不起此兒恢諧見武帝痛飲神之酒如飲  
水飲此酒者卽長生誰憐臣朔飢欲死自稱日誦詞賦  
千萬言十五通經史二十擊劍遊諸侯可以爲天子大  
臣矣嗚呼東方當知之大隱隱朝市好文不用司馬遷  
好武李廣何必喜酷吏纜上書又延見方士

二十四夜作

竄筆地下不敢寫欲哭不哭無知者草堂燒燭變青烟  
炤見游子當寒天家家祭拜鬼神走妻孥怪我不容口  
洗手作羹淚霑裳上有姑嫜聲不揚白髮中宵看風色  
小郎啼笑求衣食飛飛鴻鴈一還顧莫顧長安千萬路

黃河水深能作波泰山雖高跛羊多男兒生長荆吳遊  
齊楚不如早娶健婦持門戶何爲自號慷慨不顧家北  
涉萬里聽琵琶或云唱齊謳歌吳趨青樓輕薄多酒徒  
坐中誰操鄉土曲雜譜笳管斷相續公然帶劍出門單  
布衣年年歲歲無人歸

成相七首

成相者楚蘭陵令荀卿子所作也雜陳古今治  
亂興亡之效託聲詩以風時君余取其意綴以  
近辭且引類貴夫通於時者爲可備覽觀焉  
歌辭莫厭長試讀請成相寶鑑何年失良弓却早藏病  
將愁跋盞醫不切膏育多識詩書事中宵得禁方

吾亦能高義其如姓運期求安高士傳畏挂黨人碑五  
郡何相迫諸生不可爲好言嘗恐中得罪累文辭  
廷辱黃衣者方知相府尊弄臣歡割袖乳母計盤根郡  
邸行輪作宮門變慘冤從來唯宦寺近地易承恩  
賞賜虛耗費叨恩自御前左藏差少府內庫聽中涓官  
與鴻都市人工姪女錢翻知平準浚武帝善營邊  
上書久不報誰肯犯龍鱗多引通經士時旌敢諫臣殿  
中能辟戟郭外卽埋輪自有道人誦謠辭可具陳  
重足稱陰事隨時本陸沈鄉人投匭慣小吏舞文深驛  
馬趨行在鞞鷹集上林早求爲獄卒得意挾千金  
簾遠須卑聽先通上下情溪宮觀史傳便殿接公卿水

早時陳疏風雷豈好名狂言能見採無有不披誠

閩游留別幼光兼示臣向

君才在漢代亦是馬卿流辛苦成吾黨淒涼悔遠遊故  
人當李杜癡婢識錢劉白日江波惡漁竿莫浪投

李供奉祠

太白祠前渡登樓見大荒老松鱗甲出畫壁葛蘿長倚  
馬成宮調騎龍走帝鄉千年吹不盡采石客風霜

七月十三日

一百八十日音書竟不通鳴蟬知候到太燕覺梁空卧  
簞思南斗當軒近北風已占河射角無處覓飛鴻

和仲馭南園詩二首

白社常同宿深言慰董京鴉啼雲外月鳩喚雨中晴瓦  
屋還臨水書床正面城芳洲歌采采遙集楚湘蘅  
託意園林外溪流傍一隈詩書隨我讀風雨耐人來過  
雁翻殘露隣鷄踏淺苔向來橫吹客都不到繁臺

憶姬

小立香階淺臨風笑語微客憐新夜月人著舊時衣結  
綠空懸劍流黃不斷機但能偕隱逝椎髻可同歸

答體嚴伯父

伯父真儒者吾宗重老成秣陵青管夢栗里素琴聲敢  
謂潘尼賦羞同阮籍名昔年亡祖語因見古人情

示密之

魚網那堪鴻鴈羅君今三十泣銅駝上書持索求刀筆  
得罪陳詩忍怨歌使酒尊前豪客少低顏床下拜人多  
僧房度日忘年歲雨雪初來正渡河

送錢仲馭吏部之任粵東分臬

水漲秦淮春可憐故人載筆滿前川丹青妙畫厨中變  
尺牘成書海外傳曲奏胡床憐別鶴路當庾嶺望飛鳶  
昔時賦就江淹後爭似吳生五朶箋

冬懷二首

江北荒田棄舊農多賣油素作書傭豈無買第袁居正  
莫笑登山范彥龍太學鄰房誰下拜大家廡宇亦堪春  
病來欲獻相如賦泰岱今年又不封

龍門風雅卷三十九  
投札遠移白下城燕齊一半阻軍聲市中胡餅何心齧  
宅內茅茨有意晴憐得小姑難可嫁笑來壯女竟無情  
平生嗜酒貪奇字岸幘墻東待老兵

渡黃河

河南河北陰風多吹我愁心橫渡河近塞□兒變漢語  
中原浪子工樂歌四方邊堠有烽燧一路野田無麥禾  
水澤魚龍或不怒莫令此地揚洪波

同魯爾章劉阮仙胡孝緒郭昭子集飲

賣賦狂生知者誰過君執手慰盤匱楚人不哭終成病  
燕市無歌亦自悲豈脫敝衣成鼓史將攜新酒問胡姬  
十年莫恨披韋帶高視中原遊俠兒

燕臺懷古二首

二首

昭王賓客坐如雲荒草今看樂毅墳此後白衣辭壯士  
可憐赤日死將軍玉河莫似昆明水石鼓猶傳獵碣文  
巷有屠家能貰酒恐人擊筑不堪聞

薊門秋色冷邊關萬里飄風自北還牧馬誰能窺瀚海  
射鵬終不過陰山陣前遁寇新王子只外降燹舊朶顏  
恢復諸臣勞計策早清鐵嶺賀蘭間

聞掌憲劉念臺僉憲金天樞兩先生同日蒙譴作  
危冠伉直遂廷爭梁下先驚懸鼓聲獨坐轉慚辛慶忌  
同官還累竇游平人言太尉門墻峻帝識萊蕪釜餽清  
臺閣一時誰表率飄然南策蹇驢情

秋興三首

丈人何地覓龍威  
秃筆重嗟董子帷  
芳樹流雲添晚翠  
老荷著雨見新肥  
辭巢海燕空梁舞  
索食鷹烏短嘴饑  
誰道蓴羹鱸膾好  
江東張翰未曾歸  
去坐同日紫雲  
舅家風雨散帷囊  
少小呻吟外祖旁  
同載神童慚孝綽  
難成宅相負思光  
豈憐蒿里悲飢歲  
遂有麻冠哭大喪  
骨肉至親誰執紼  
到今泪濕九秋霜  
莆田七月海風秋  
誰到江東寫我憂  
露冷芙蓉王儉幕  
書藏夾漈鄭樵樓  
卜居未有安危信  
行路方知出入愁  
笑指雙星河漢濶  
明朝不肯渡牽牛

重弔左少保公二首

應山桐水泣清風  
先帝彌留顧命同  
遂有奸闖通內侍  
果然賊罪殺孤忠  
黃芝獄底原難問  
白鵲車前竟不終  
請謚十年纔定議  
持將血淚對楊公  
青山惡馬出龍眠  
嚙指書成血字傳  
三世難餘齊變姓  
兩河義士各輸錢  
移宮得罪中人後  
鉤黨含冤獄吏前  
辛苦吾家諸舅氏  
卧薪獨有子孫賢

東懷方大密之京師

夢到蘆溝夜渡河  
灰沙風色近如何  
蒲葵粗扇今當貴  
練布單衣客定多  
秘閣有書堪借讀  
兩京無賦好摻羅  
比來料得張公市  
曾記空山挂薜蘿  
東懷姜三如須大行

混跡江湖不合時  
姜郎知我最狂癡  
還將草閣閒情賦  
遙問章臺絕妙辭  
長孺危冠常向主  
季方高座早為師  
驚聞拜命行人後  
抗疏先殲逆黨碑

無題八首

雀釵寶祿近闌干  
斜貼珠璣綴宛蘭  
趙姊洞房初舞鳳  
韓郎玉案恰棲鸞  
空階小草茸茸濕  
繡幙餘香冉冉寒  
豈是感甄徒作賦  
朝雲只對維神看

小婦驕人織錦忙  
流螢細撲爛生光  
石家閣掩芙蓉慢  
秦氏樓裁文杏梁  
腰帶恹圍休恨妾  
指環偷墮漫羞郎  
東鄰搗盡寒衣杵  
薄命秋風夜上堂

風流蕩子狹斜身  
慣是癡情作使人  
瑪瑙粧成嬌惡少  
珊瑚擊碎惱芳春  
金釵艷就文犀動  
綺袖香含寶鴨新  
無耐瓊扉矜細語  
教儂妬殺小平津

蹀躞章臺陌上聞  
漫因夫婿遠從軍  
庭花閒放丁香雨  
爐火重添甲帳雲  
鏡裏孤鸞教妾舞  
簪頭小鳳背人焚  
腰支一病渾無力  
獨怪東風透薄裙

畫得怡雲舊有圖  
便將滌器學當爐  
愛扳花底邀郎折  
私訴樓前畏母呼  
眉際嬌添螺子黛  
鞋尖香惹鳳頭珠  
單衫恹弱西風立  
小語闌干怨阿奴

浮槎恰值晚風波  
小小黃姑怕渡河  
雲母疊成秋裏字  
雪兒解唱夜來歌  
耐將文錦供詩話  
慵對香奩喚鳥過  
卿便成名天下少  
為郎卜得嫁如何

底事傷心恹畫廊天涯孤鴈病相當微聞蘭麝朝成霧  
似怨寒蛩夜喚霜夢裏青絲臨大道閣中黃葉下橫塘  
憑闌小啓桃花口倩得東風送語郎雲母盤飴好菜字  
小折濤箋喚奈何背人私自問鸚哥傷心江月隨郎遠  
薄命湘雲笑妾多鵲上菱花須聽鏡烏啼柏樹漫停梭  
書空無限相思字傳得嬌情入窄羅

邊詞

獵馬陰山帶箭傷腰懸寶劍白如霜東方千騎誇年少  
豈問深閨夢短長

寒食述懷

寒食蕭蕭拜掃時春花撩客倍傷悲宮門懸得龍蛇字

猶有人憐介子推

方其義

字直之中丞仁植公之次子也五歲能辨四  
聲屬對如流稍長籍諸生帖括之餘輒喜為  
詩才氣蘊涵書法規摹平原尤冠絕一時性輕財  
好客折節師友旁及詩人畫史羽流劍客彈棋格  
五馬醫灑屑之屬皆樂與之遊解衣推食務厭其  
心有膂力能挽弓五百斤嘗衣短衷隨其父中  
丞公開府於楚與材官健兒相追逐據鞍橫槊顧  
盼自喜有河朔俠烈之風既因大厦莫支放廢家  
居所作詩多愴怛憤盈之詞君子讀而悲其志焉  
子中發為之蒐求放佚彙次成集其義舊陳子越  
樓為之序以行世日時術  
堂遺詩凡六卷可以傳已

上黃石齋先生

瀕洞蓬萊波彈琴移其意今人飲濁流故無滄海志漳  
浦發條風醒者皆知醉江水派朝宗行潦亦四至方諸  
吸月華河清未為瑞浮雲墮海涯鯨鯢竟作崇鳥鵲晝

悲啼鮫人夜半淚一壺起中天魚龍爭辟易從此霄漢  
間永無孝與慧

### 烈士行

烈士不可無頭顱不必有嗚呼樊將軍千載淚函首紫  
綬束在腰金印懸在肘騶從過洛陽車裂亦不朽富貴  
極生平焉知百歲後笑彼投閣人寂寂復何有

### 良將行

頗牧未遇時神骨當積燬雙龍鳴匣中光芒照秋水既  
學萬人敵又能觀大旨決漏殺宰相吳姬樓下死閨情  
中夜斷傷心獨吳起果然將百萬何妨殺妻子

### 撫楚嘆

流氓起西鄙羽書何旁午焚殺十餘年生民塗炭苦諸  
公舉我父簡命往撫楚先後秦八捷陵藩俱安堵倡議  
力主勦他人偏欲撫踰年賊果叛言中人更怒川沅詔  
會擊逗留兩開府楚將獨深入陣亾尚優叙近者不救  
援顧乃逮我父黨禍相鉤連實僭封疆處悲哉復悲哉  
惟賴聖明主

### 黨禍

北都旣陷賊南都新立帝宵人忽柄用朝野皆短氣魑  
魅登廟廷欲盡殺善類忤者立齏粉媚者動高位麒麟  
逢鉏商豺虎遂得勢手翻欽定案半壁肆羅織蕭遘反  
被誣趙鼎亦受詈直以門戶故忠邪竟倒置可憐士君



子狼狽竄無地我家爲世讐甘心何足異寃死不必悲  
所悲在國事先帝兒難保我輩合當斃仰首視白日吞  
聲一灑淚

西變記略成感書

甲申旣可哀乙酉更堪哭人競擁戴功白板爭官祿巨  
憊况謀用一旦秉樞軸只顧報私讐何心圖恢復緹騎  
遍州郡忠良滿詔獄忽聞清君側矯旨巡部曲徵兵拒  
上流不復守河瀆拱手送金甌眼見惠懷辱王衍且勸  
進索絛望收錄此輩賣國家恨不食其肉陽九亦大運  
傾覆何太速飲泣筆此卷腸斷不能讀是非久論定留  
以待史局

哀濟南

崇禎庚辰濟南陷張方伯公身殉難方伯夫人我伯姑  
攜妾投入大明湖夫爲忠臣妻烈婦名垂天壤真不朽  
天子明聖如上聞自然贈官錄其後方伯實爲我婦翁  
招魂不得來山東可恨中貴師八萬不援孤城城遂空  
誰與守誰與戰哀哉新正成此變使我兩袖淚如霰

醉翁亭贈馮鄴仙先生

招手狂歌呼永叔醉翁何處歸華屋作書者誰蘓端明  
揮翰離披眞朴遯本朝姚江先生來講壇終歲絳綃開  
是時不聞爭戰苦綠鞵花陰長莓苔衙齋斜倚豐山側  
老梅怪石兒孫列亭子荒蕪浪得名山水文章主人缺

邇來東海馮夫子下車關逕成幽市  
甃石依雲貯滿囊  
草堂山閣無起止  
薜蘿遍地扶持之  
何況凌雲叅天姿  
翳蔭十丈羅生徒  
揖讓扶風高密師  
維時海內宗盟落  
學者四走無依泊  
南渡黃河北涉江  
侏侏負笈趨南郭  
太僕門前寒士多  
更有方生陳磊砢  
先生大笑延末坐  
叅軍行路愁長歌

酬彥林畫

近日文人工繪事  
吾社往往稱高視  
筆墨之外烟雨生  
鶴湖錢子多奇思  
我有東絹懸中堂  
當暑四壁秋風涼  
眼中丘壑無如此  
畫工千紙失泐泐  
洋洋天授非人爲  
天下江山鴈蕩奇  
舉頭四顧天冥漠  
墨氣淋漓想見之

我性戀名山所見亦非一  
不善丹青嘗閣筆  
安得到山  
攜山歸袖裹白雲  
放雲出故人寄我吳江綾  
吳綾一幅  
山幾層上寫蒼蒼之遠  
樹下寫田田之芰菱  
披圖如夢  
忽如寤一泉一石知其處  
竊恐中有無晴龍  
他日聞雷  
竟飛去

夜泊赤壁秉燭遊之

秋雲黯淡愁荒野  
孤舟夜泊赤壁下  
江月不出行人稀  
四面棲鳥啼啞啞  
欲眠不眠重秉燭  
曳杖披衣駭童僕  
臨江把酒酌坡公  
獨飲一杯歌一曲  
曲終仰首天蒼涼  
清風颯颯吹衣裳  
武昌夏口在何處  
白波萬頃空茫茫  
此時星河亦錯落  
葦岸秋蛩鳴絡索  
登舟四顧夜無聊

酒醒不見橫江鶴

### 廣陵行

廣陵九曲通咽喉由來一區稱金甌四方琬琰皆雲合  
爭趨十丈新城樓新城巨商與大賈舊城達官被文組  
郎騎駿馬婦登車雜踏靡麗喧簫鼓水清山平人物輕  
皤翁野姑能嬌聲此地從來產顏色盡說傾城復傾國  
浣紗之女不敢南燕趙之子不敢北繡閣明珠未及笄  
聘作城中貴人妻只有陌上採桑女秋來當戶操機杼  
侯王折柳行過門風前一盼銷人魂不惜千金與寶璐  
急從冰上尋老嫗今宵翠羽鑲新郎束素一抱雙琅璫  
柔枝香質情意恹豈肯嫁作公子妾多情少年善不平

廣陵女子多虛名一陣寒風城外至削蹄寒玉如雲騎  
男兒橫尸七十萬家家夜夜征人睡炙羊生莼透羅襦  
牛皮馬革親肌膚忍恥據鞍嚼早韭朝餐霜露醉烟酒  
更有河南諸娼家惟聞鬼哭無琵琶早知今日爲蓬醢  
衾枕傷心顏色改不如盡嫁四方人留得美人在湖海

### 憶兄

山崩地裂慈母死至今二十四年矣兄方十歲我三齡  
痛哭思之何處起老親愛若雙明珠我啼夜乳兄朝哺  
行行讀書各成立相期接武遊天衢喜兄努力成名早  
不材愧我終潦倒那知天步日艱難勲業空餘憂患老  
只今未語已先悲幾載天涯生別離憶昔神京天晝黑

龍太鼎湖攀不得萬死一生全苦節南歸鈎黨重羅織  
膝下一拜雙淚垂單衣破帽從此辭緹騎如雲紛四出  
變名幸得藏鬚眉老親在家應官捕又見風波移韋布  
我亦間行逃微軀兄之三子委道路父子祖孫各千里  
南北東西悲瑣尾青陽建章復蒙塵猛虎玄狐江海濱  
老親又禿姑孰道一家細弱命我保間關提挈返龍眠  
髡頭赤足問荒田荒田确确不可耕仰天忽聽悲鴻鳴  
悲鴻鳴兮念遊子別後音書無片紙饑寒未審存一身  
飄零何地淹年紀吁嗟乎傷哉日月清明浮翳開殺人  
鬼域已成灰老親日日登高臺呼我極天望消息兄胡  
爲乎不歸來

感懷

故鄉烽火後頰首祝功臣壯士方悲楚何人說避秦赤  
眉殘郡邑青眼重金銀莫謂居官好中原失撫循

范質公司馬

衣冠當代盛慷慨一名臣忠計風塵苦皇恩賞罰新詔  
書朝夕下封事再三陳誰識秦淮上愁心寄白蘋

比江東

南陽何必問冤殺薛濤箋長短休開口狂癡亦比肩紫  
羅囊不佩白羽箭高縣名士今安在寥寥三十年

贈羅訥菴黃門

都梁懸珮玖人識舊君章白簡三更漏清溪五月霜好

持簪筆意夢與畫沙長嶽嶽東南柱英雲繞夜光

客雲間聞楚警送杜于皇歸白門與宋轅文徐惠

朗共得安字

仗劍同湖海霜風九日寒赤眉乘勝易黃耳寄書難西  
渚思雲夢東墻老建安到家秋欲盡落葉滿長干

### 金山寺

峭壁俯千尋驚濤兩岸深寺鐘寒度水江日晝生陰海  
近潮聲濶天高野勢沉中流誰砥柱巉絕到於今

### 秋閨怨

嫋姚征冀北六郡盡從軍一夜秋風至千家砧杵聞月  
斜侵角枕露冷濕羅裙坐看長城鴈翩翩入斷雲

### 東孫克咸

仲謀湖海士抱膝到如今入世逢三甲行師卜六壬擬  
騷悲楚調逸興託胡琴莫負聞鷄約神州忍陸沉

### 自怨二首

譏誹一賤子何日脫羊裘忍恥同睢溺隨時漆伯頭蠅  
偏憐白望燕合戀青樓但恨前車覆朝朝載鬼遊  
自試龍泉劍頭顱值幾文甘心爲厲鬼剖腹示降軍莫  
怨天難問何愁稿不焚市中爭短我未必是陳君

### 野宿

芳艸闌萋萋鄉心逐馬蹄亂雲時聚散流水漫東西歲  
月消烽火江山入鼓鼙壯懷看漸老惆悵此聞鷄

書宋子建記黃石齋先生召對冊後

廷對聞當日風生御座前廟謨攄激烈天語荅纏綿揅  
策原三易量沙說九邊千秋遺正氣長與汗青傳

自金陵送敏功同舟至淮言別

客路此朝天相逢亦偶然不圖滄海變還博故人憐壯  
業輪霄漢生涯苦石田承明如有問殘野望全蠲

秦郵舟行夜泊

日出曉光微天空一葉飛人隨帆影太山送客心歸平  
澤風車動低田茅屋稀蘆中來舴艋遙問有魚肥

同百史阮仙夜坐

坐深忘寐後永夜一燈明人隔疎籬語鐘傳別寺聲竹

風清梵唄花雨靜楸枰無限相逢意當年老弟兄

拜五世斷事公墓

一命遐荒賤捐軀痛不禁但知臣節重寧論主恩深白  
骨無鄉土丹心自古今松楸三百載魂魄尚森森

春仲入里聞子留弟將至爲此懷之兼贈念松二

章

二公皆禿余亦  
有釋名故及之

網羅雖脫盡形影復誰憐節序留僧臘乾坤托梵天新  
聞憑眼底往事付生前劫火燒難燼何愁骨不堅

笑病今何似聞知破衲來老春猶有雪二月尚殘梅世  
眼唯軒冕天恩獨草萊辯才持一炷待爾講堂開

贈吳駿公少司成

久傳高閣過平津容與微風動暮塵方集南皮天下士  
肯辭北海座間賓蓬門幸辱檀車跡槐市還吹黍谷春  
虛語拮据何所用如今經濟重名臣

贈田在履

楚水東流勢不回棄家今日向南來鶴鴿有賦騷人忌  
豺虎成羣蕩子哀太國詩書還在壁滿天風雨亦登臺  
悲歌難盡傷時事聖主臨軒正愛才

慰勞臣

何愁石上勒龍驤髮怨絲恩不可忘鸞鳳偏教棲枳棘  
蜉蝣並未美衣裳饒他詩酒陪雕輦分定風霜老戰場  
市井皆知廉吏賤苞苴白晝到明光

贈錢仲馭職方氏

名成十萬任操觚借箸論兵寄虎符鼎鑊何妨懸北闕  
烽烟愁看列南都轅門戰士誇騏驥座上狂生泣螻蛄  
引領長安難自薦漢廷今有積薪無

題宋子建君子堂

中原極目半丘墟誰是隆中舊草廬高卧獨容存百尺  
讀書差不負三餘逢秋腐草慚難化當戶芳蘭忍說鋤  
躑躅風塵歸未得同君且飽食鱸魚

周農父業師秋浦試竣賊阻不得渡江遂爾東下

今送之歸

秋風纔罷雪飛花極目寒雲蔽九華戰伐乾坤成沸鼎

流離踪跡等浮槎青山隻影江千里白髮重圍天一涯  
傳道故園烽正急那堪徒步夜還家

錢彥林家伎久爲劍客因余強奏數曲志之以詩

並贈

渾脫爭憐劍舞才梨園宴罷爲重開纔誇擊伎盤空捷  
忽作歌聲引扇來白苧新詞公子就紅牙小拍使君催  
三更掩袖爭行酒醉後猶添一百杯

懷范小范

堂前白髮近何如菽麥離離好荷鋤貧賤祇堪求避世  
澄清莫漫說登車已捩歲月供漁艇豈料江關遍羽書  
風冷漳湖飛雁少思君夢裏寄雙魚

陳百史自三洞來一路未嘗舍都亭也時將發公

車聞警且主余所感而贈之

六月南屏漫採蓴結交湖海亦憂貧應融何處知遊子  
謝著原來是故人夜草長楊淹歲月春風行李隔烟塵  
濁醪莫惜尊前醉珍重聞鷄是此晨

送張五叙北上

辭家何事蹈烽烟西望長安路幾千半壁殘燈鄉夢冷  
一鞭斜日客心懸書生挾策容誰獻宰相求才想自憐  
好向秦淮橋上望名成十月早南還

懷余大微中台

五月鑿輿出帝京東西夜走避官兵莫因婚嫁愁兒女



青眼風雅卷三十一  
且望干戈憶弟兄我以鄣山爲兔窟誰知黃海雜泉鳴  
攜家仍問鄉關路隴上田荒不可耕

一見陳少宰卽書

何時單騎出長安涕淚塵沙送羽翰相見忽驚生死後  
當年未曉別離難滿天羅網疎還密萬里風霜暑亦寒  
從此肝腸投白水故人原不羨高官

悲敬亭

宛水烏啼永夜哀啾啾鬼哭正東來明知煉石天難補  
妄擬揮戈日可回壯士豈緣深感激書生原不悔癡  
獨憐一片萇弘血萬劫長然未死灰

哀秋浦

萬羅劍客射金鉞嘆惜延陵未識時報國幸猶存草澤  
捐軀真不愧鬚眉旄頭照夜誰能指箕尾橫天獨許騎  
酌酒勸君爲厲鬼黃塵青草任迷離

金陵江上感懷二首

百雉橫空映夕暉蔣山烟樹望依稀戰艘有詔方南指  
江浪無情自北歸陵月荒涼人絕跡宮雲黯淡鳥愁飛  
漁翁獨向風波老蓑笠年年鷺子磯

野草青青塞馬肥京華冠蓋盡征衣宋臣有意求金鎖  
蜀女何妨操玉徽鸚鵡已棲新殿闕鷓鴣仍愛野薔薇  
高標節度江南省市井人猶說帝畿

乙酉秋日登浮山有感

亂餘苦徑欲全封策杖重登第一峰世局推枰輸遠祖

宋遠錄禪師與歐陽公因棋說於此時平賜藏想神宗萬曆時特遣中官賜藏於華嚴

寺開雲暗鎖千崑竹落日寒鋪萬壑松轉嘆禪宮鎖歇

盡此間猶未見狼烽

### 風雨泊石頭

一堤官柳路歌吹想當年怪得遊人少新添渡馬船

### 明月謠

常見如鈎曲何曾似鏡明終年十二度能得幾宵晴

### 瓊花觀

露冷香消莫用嗟羞從人世戀繁華無情豈學長堤柳

送却楊家又李家

### 邗關

青燈紅粉遍河干客去燈殘酒易寒滿眼淒風鳴瓦礫

舊年流血未曾乾

### 風雨歌

江臯露濕漁歌苦兩岸荒鷄聞擊鼓何處征人數斷腸

一聲新雁三更雨

### 黃天蕩懷古

鼓金山赤幟新百年南渡氣纒伸潰圍遺恨雖天意

獻策誰知是漢人

### 家大人被逮泣別

白髮蕭蕭擁檻車呼天搶地欲何如傷心含淚無他語

焚盡詩書再讀書 平天會出定何如 必合飛龍出

蔡文姬 燕趙並限 空賜 飛龍 必合 飛龍 出

十二年間日月長 朔風邊雪斷人腸 若非天子賚金壁

雙抱口兒忘故鄉 百平南 燕趙 並限 空賜 飛龍 必合 飛龍 出

答默公新夢詩

一曲驅歌拍未終 故人識我在墻東 晝眠聽得階前履

無數春梅落晚風 兩 燕趙 並限 空賜 飛龍 必合 飛龍 出

風雨

百平南 燕趙 並限 空賜 飛龍 必合 飛龍 出

青 燕趙 並限 空賜 飛龍 必合 飛龍 出

送 燕趙 並限 空賜 飛龍 必合 飛龍 出

龍眠風雅卷四十目錄

木厓潘 江蜀藻輯

山陽丘象隨季貞

同里劉鴻都爾雅 參

孫臨 一百四首

新編一百四首

同里隱居詩

山園五家詩

木里歌

龍眠風雅卷四十一目錄

龍眠風雅卷四十一

木里潘金江蜀藻輯

孫

臨

字克咸司馬餘菴公少弟也賦性伉邁博極

諸名流雅相引重日擊秦寇躡中原然指嚮馭思

以武功自見嘗入楚撫方中丞之幕短衣匹馬往

來號曰武公年十六補博士及舉明經不欲赴選

甲申後挈家雲間幾與陳公子龍夏公允彝之難

間道入閩伏闕抗疏投職監軍與楊中丞殉難聞

嶠遂合葬于桐卒年三十有六所著有律雅集楚

水吟我煙集大略齋諸稿行世楊中丞真南人諱

文驄字龍友父子四人同日俱死其文集行實詳國朝風雅集中

置酒高殿上

甲第集嘉賓鳳樓開九重椒壁麗綺窓繡桷金蓮叢金

鋪敞立露綺幕不勝風解紫烟揚寶帳綵起綠雲中雕

觴溢清醕香散玉盤龍趙姬罷鼓瑟齊客厭絲桐二解琴  
辭將雛鳳歌喧落塞鴻中有秦川女巧飾珮玲瓏婀娜  
白紵舞一曲三嘆終三解但惜秋塵起歡愛逐衰蓬日落  
青苔滿霜墜錦筵空芳年及早樂候管和六同四解

### 鷄鳴

鷄鳴日將曙蕩子無所之天下太平久出門歸無期碧  
玉雙樽酒作使邗鄆姬在床知蟋蟀風寒知股栗池中  
雙鴛鴦鳴聲不成匹如何雁南征驅馬只北行憤厄倉  
浪天守吏皆清平清平安可梗梁少懸衣冷舖糜且斷  
餐覆瓶汲深井憶君天一方出入黃金堂公侯爲兄弟  
尚友侍中郎煌煌金絡馬觀者如堵墻不知顛顛深收

### 淚倚長廊

#### 相逢行

霸陵初相逢兩馬俱乘良何來一年少踟躕田野傍夾  
轂聊相問君家在何方郭杜是君家出門通羊腸金玉  
飾門楣赤璫羅垣墻庭前列雙桂宅邊環青桑挾我開  
西閣揖我登高堂弧矢懸戶外寶劍繫雕梁內廡有名  
駒其名爲驪驪陸離紛鞍勒常驂禁中驥廣筵出豐膳  
烹牛宰肥羊窮珍極水陸金盤薦鯉魴楚歌雜楚舞佐  
酒燕趙娼大夫坐東席侍中坐西廂執戟居其中羽林  
盡行觴衆賓咸恣樂所悲夜不長

#### 飲馬長城窟行

城窟水且寒驅馬飲滿腹荒郊多陰風大原稽留長城  
築板築功難成官作諸汝聲千里連連初一簣何如格  
鬪死邊城邊戍日月久白骨如岡阜家中多寡妻盡是  
健兒婦夫死骸不歸便嫁畏人譏不忍離姑嫜雙髮白  
如絲結髮新婚初宴爾徭役抽丁報天子傷心故邊疆  
妾非有身先君死生女不用哺恐爲軍妻孤且苦濠隄  
死人相撐拄縱是生男亦莫舉并字數難清亦非開  
玉女捧金甌飲者稱聖郎甌中是何物云是琳腴漿不  
願服此藥長跽請其方

白紵舞歌辭

柏寢桂宮蘭杜香象筵玉柱朱絲長犀渠鈴匝組幃張  
文茵朱爵列高堂炮鼉膾鯉錦席張明燭蘭膏皎夜光  
蒲萄鬱鬱起瑤觴凝華結藻鼓笙簧趙瑟秦箏嬌畫梁  
紈扇佳人飄舞裳清謳繚繞素雲揚嫋嫋鸞歌雜鳳凰  
颯沓羅袿過長廊首飾琅玕金懸鐙含商咀羽斷君腸  
舞罷龍轉入椒房明星參差沾露涼團團鷄子東邊黃

西門行

第宅甲諸郡田園傾通都寶玉藏西閣黃金埋東隅門  
無弄文客愛畜桀黠奴夜以繼朝日券負取懽呼醜婦  
供恩寵自以爲名姝堂前傳客來惡草可以厨食不過  
菜羹裘不過羊狐日入以萬計常多不足虞所得賢子

孫惟算入錙銖有錢不欲使何如擔石夫

思悲翁

迅駒將過隙可望不可留為樂及芳晨所以秉燭遊愚者不知惜出入皆為愁致使少壯年同之霜草秋不見身啼墓悲聲下松楸

少年行

日夜磨雙刀直走通都下叱婢敕厨羹呼兒裝寶馬不顧斷饗殮架上衣裳寡妻子牽衣啼聲聲為之啞拔刀斫雙裾含淚如湍瀉一往八九年不得歸田野辛苦昏暮馳無冬亦無夏瘡畝已盡荒閒庭斬梧檟始知君有仇報之血盈把法吏過搜求牙旗不復捨晴霽成陰霾

塗白以為赭何況盜賊多願君好為者

今日良宴會

為吳子遠開永社廣集

朝陟西山巔暮走長干路鷄鳴蚤出門戎服團朝露鞭馬直如飛一矢斃雙兔李侯有愛弟與我相知素能開一石弓雲中射孤鷺十五好野戰殺人不反顧二十通兵法鬼神隨風雨不意大將才生長在統袴我欲速歸來李侯問我故告以吳遠公置酒秦淮渡比比秦淮人宴會無昏暮可惜美少年皆以服食誤聞君開綺席秦淮人不數四座欲高談對子不成句子數多大言翫麟先時務此夜左席虛以我不能赴

古別離

朝發蔥河道暮至桑乾原親戚自此遠百里無人喧前  
日置尊酒連鑣出東門白衣爲哭泣哽噎不能言須臾  
整肅駕且復進盤飧妻子爲長別斷絕鴛與鴛生當復  
言歸死當善招魂壯士不顧返策馬佩雙鞬戎幟亦星  
羅邊騎如雲屯冰雪傷肌骨艸木冬不繁縱有歸來時  
故人不復存  
朝暉升扶桑燿燿照林端林中有高閣閣上棲孤鸞中  
有愁思婦燦燦綺與紈金雀垂藻飾雙蛾揚翠翰一唱  
鳴九秋三嘆凌七盤清音入雲際哀哀素指彈歌者徒  
自苦天下知音難征人處塞外霜雪被雕鞍入息不免  
胄晨起不能餐北方陰風多身上衣裳單肅肅薄宵征  
聲聲奏苦寒願得比翼飛一舉至臯蘭

咏史

不愛黃金產爲韓往報仇東至滄海國椎秦博浪頭大  
索遍天下下邳亾悠悠老人圮橋上角巾且被鞬五日  
鷄鳴往尺書爲校讐一自爲廐將帷幄多運籌特以三  
寸舌得封位列侯萬戶不敢當食邑願在留布衣亦已  
極窮老乞歸休願從赤松子謝絕歸山丘如今穀城下  
會無黃石遊

靈臺望雲物墳策集京師抱負逃林藪補綴及明時袒  
割辟雍上執經考所知園橋觀聽者洋洋共追隨一自  
薄藝文講席爲虛糜朋徒多散失博士尚狐疑學舍爲



園蔬羹豎刈薪資圖書與縑帛剖散無所遺小者爲藤  
藁大者連爲帷蕩廢亦已盡菟首空尋思

錄別五首

陰雲翳朝日薄寒履微霜北風動地起飛鳥林中翔征  
人悲往路列酒陳高堂奮衣出門去欲濟河無梁且進  
一樽酒明月在他鄉憂來人莫知感憤結中腸異域賤  
桃李零落瑤艸芳但願崇明德別離何足傷  
驅馬涉長道寒風吹客衣關路阻且長霜嚴草木稀蓬  
戶多蠨蛸蘭室動伊威四顧絕人烟天寒常苦饑遠行  
徒軼軻傷哉心獨違北風飄浮雲飛飛將安歸願託晨  
風翼高舉凌風飛

之子遠於邁往路何皓皓曉露生秋衣寒霜飛百草蟬  
蛄啼東壁游子在遠道白馬仰天鳴局促傷懷抱少壯  
各有時立功當及早堂上荆杞生繁華同枯槁昨日園  
中花一夜皆衰老

皎皎有明月餘光照高樓誰人起長嘆獨坐彈箜篌哀  
音入雲漢淚下如泉流切切陰風暮天寒無重裘江湖  
深且迥欲濟無方舟異鄉亦何樂不若歸故丘君卽不  
識察妾心良悠悠

登高臨四野北望艸木秋我行還幾時大火已西流時  
厲衣裳單浩露冷衾裯晨鷄鳴高樹欲歸道無由年少  
貴結交何用守荒丘拔劍下高堂慷慨縱橫浮盃中有

斗粟行無內顧憂黃金亦已盡安能遠行遊  
蘆舫冷秋蟲沙田噪野鶴零露侵人肌知是衣裳薄城  
遠不知更談深月已落鷄荒次第鳴此夜聲非惡故交  
間幾年僑寓悲離索今夕共危言皆賴應人幕予往戮  
長鯨君來賦孔雀指畫天地間歎息忽然作昧者測予  
心說在香閨閣不走章臺駒神女猶步洛維子知我深  
側枕問三略夜長不奈眠况是驚人析

珠勒關風鳴小駒熟深巷明朝恐不來珊瑚鞭作當房  
櫛黑如墨雨不察顏色舉手著郎肌終不葬馬革戎服

日夜裁告儂驅之楚淚下枕將浮不敢向郎語鐵鹿一  
丈高西風刮天曙舸舫當輕遙奈得褐無絮大鵬飛龍  
子綺閣愁無奈杏子秋衫寬郎歸盼儂帶城頭更漏枯  
小字相呼素楚山障青天三五望蟾兔楚臺多冽風刺  
人中鐵甲臨岐馬上言萬勿遊巫峽千帆上下吹五日  
千餘里雜佩置袖中非汝之爲美

自刺

生日拈

弱冠事詩書生長在桐國兄弟有三人同爨共飲食堂  
上有孀母年邁不罷織內外孫十人含飴悅顏色故國  
數兵焚流落何所極瘠田幾百畝四年無稼穡不敢怨  
天時皆困苦於賊傷哉予伯兄懷寶無人識四旬困青

衿遷在秋浦側仲氏蚤黃門條對過于直要津且忌之  
恨不先落職所以遷閒曹杜門在薊北予年二十餘學  
步還匍匐游好在陰符所都是文墨馬背逞強弓弓開  
一石力親戚爲我言鄉人爲我慟何不同時人青紫取  
常飾安得立功名一志在金革不能遵時趨窮老一溝  
洫願學傅介子弃繻不可得欲同班仲升龜茲莫能克  
所以娛美人晨飲至天黑此意欲何爲諸君還默默

過宋子建明月軒

彌棹霜如雪出舫視華星寒風飄衣帶素悅染緇塵  
所艸旣萎絕長流履層冰欲問此何時來者與我親  
雉雀充淮海我復阻雲津耿耿天漢曙蒼蒼霜水清  
中洲攬留美將以問幽人幽人臥東臯喬木俯空庭  
剪棘開新圃采藻葺荒亭珪璧契文府湖海覽英靈  
朋好不相違皎月炤冬青風來月高出開戶得良朋

聞公訪余兵事謾爲條達

寒日淹以晚北風吹野田零霜被短褐慘悴臨清淵  
桑上聞鷄啼游子不遑眠偃蹇南屏下知子來幽燕  
奈何承華中揚雲無甘泉歸保隆中略管葛相比肩  
予卽石孟群磨涅心頽然季冬十二月執手不能旋  
相踰周一歲江南已烽烟土瓦自崩解且言城不堅  
對酌一長歎此身何以全雲中王子喬告予以長年

定情篇

冉冉孤生木附得女蘿草飛飛雲中雀比翼戲清沼霜  
露摧其英芳華同枯槁羽毛驚網羅雙飛豈嘗好春風  
二三月含生睇天表榮華發故枝野田和新鳥所以生  
死殊情分多與少新人曜朱顏灼灼吐花早卽意故人  
存故人顏色老蘭燭照靚妝此夕當精討男兒縱意氣  
後婦以爲寶

江南曲

春日長春水深田田荷葉南湖陰沙棠舟窈窕女蜚穢  
垂髻雜白褚手持莫難將雛曲蕩漾青波照紫殼纖纖  
素手束金彊綠水傾落玉搔頭東風四角吹龍子札札  
橈聲送急流艇子兩漿長橋渡行行直上天堤路廣所

聲悲盧女絃女兒聞之泪如注蕩舟十里新荷香繁華  
遊客歌前塘玲瓏雜佩秦川女千金買笑少年郎使人  
借問誰家子終朝溪畔採蘭芷徘徊欲贈明月珠湖邊  
顧見雙鴛起三月正芳菲桃李挾容暉佳女嘆空室倉  
庚鳴繡闈吳布雖廣濶相贈作征衣鄰家私愛情何限  
春色年年望君歸

江夏行

美人眉目隱輕紗盈盈顏色嬌如花自從遠嫁商人婦  
年年行估不歸家憶昔濃妝在深室紈袂含羞門不出  
西市欲開連理枝東隣願得投膠漆急時裂繒成衣裳  
泣對父母聲啾啾車上唾壺紅玉鮮池中蓮蒂鴛鴦匹

高樓初日照梅梁，翡翠窻前插鳳凰。逶迤蘭筵香風滿，飄飄環珮出長廊。多情共惜芳華月，明日揚帆下吳越。不傷秋老碧桃顏，最苦相思情不竭。送君直上大江頭，茫茫烟水隱離舟。江空遠度鷄鳴曲，月冷先披鼉子裘。短笛莫歌桃葉怨，素箋頻寄竹枝愁。妾心不逐東流水，歸去常依鳩鵲樓。樓外芳堤鳴鶉鳩，思君不至音書絕。人當年少盡綢繆，儂獨少年遠離別。遠離別心獨傷牀，中繡被聞餘香。昨夜他家遠遊者，言君又欲過橫塘。橫塘娼女被統素，清歌嫋嫋後庭樹。羅幙歡傾玳瑁杯，空聞夢斷江南路。江南迢遞北風寒，蕩子不知行路難。行路難，隔千里，玉筋啼落湘江水。女兒莫作賈人妻，終朝

別怨碧窻裏

易水行

易水蕭蕭送啓行，旣祖取道餞荆卿。座上親戚爲白衣，慷慨悲歌變徵聲。燕丹報仇苦日晚，壯士一去不復返。待客不來天一方，治行乃令秦武陽。千金買進咸陽殿，督亢圖窮七首見。何爲十三殺人者，未至陛前皆色變。嗚呼荆卿身死報相知，可憐空殺樊於期。田光先生虛一激，千古還爲英雄悲。吁嗟乎荆卿之身已死後，又有擊筑置鈴高漸離。

流寇圍桐伯兄艾庵率其父老子弟効死勿去三

晝夜圍解

山城日夜催板築築土未堅賊信宿已聞豕突破巢廬  
老稚釁鼓丁壯戮桐川殺氣不曾平舊鬼兼雜新鬼聲  
襁負男女東西走野竄哀哀避寇兵隔河遙見賊旗至  
倏忽成群數百騎僵尸草積齊山巔戍卒三千空墮淚  
東郊火發西山焚城上高呼徹九軍蟻生甲冑有張許  
乞師獨無南霽雲亦有將軍號衛霍一聞賊至先落魄  
大都強郡不能當獨當三里之城七里郭晝夜環攻火  
照天矢石轟雷如雨懸執戟書生多決策其如冑刃張  
空拳依城營壘夜吹笛城內伏姦無處覓哀哉賊勢猛  
如狼百萬師老恃堅壁堅壁終宵無應援烏衆安能爲  
我奔春秋孫子于今在孤劍難將答國恩

論兵

勇能破敵不用馬計在埋伏深山下殺賊不習矢與弓  
妄言九龍之火攻嗚呼連年對壘楚豫秦不知設伏殺  
幾人露章報斬賊首數百顆且問多少死于火黃鬚猿  
背老轅門只是張口不能言君不聞王平識不過十字  
可以倉卒治兵事馬服之子多讀書長平一戰爲丘墟

哀長平

長平日夕悲風起四十萬騎一時死燐火蕭蕭陰雨青  
茫茫白骨土花紫飛鳥啄人上樹枝隴前子女日夜悲  
沙田人路久已絕梟鴞存歿君不知白羽從軍離鄉縣  
刀頭飲血惟一戰可憐身死在沙場少婦高樓望不見

音賦風雅卷四十一  
衰艸黃沙寒日曛山空曠野度愁雲西望咸陽杜郵道  
不須重弔武安君吳諫尋邈豈不賦白林外草滿秋  
舟行風雨夜孤舟人土樹外誰前平定江流  
白浪過船西風厲拔刀刺之天不霽短檣札札濕濛濛  
雨中亂落秋花細遠山斷續陰霧平老樹枝枯風鬪鳴  
二三吏卒操戈戟斬然不敢差踐更更深舟破愁生濕  
隔水微聽蛟龍泣啓篷莫辨東與西獨被短襦燈下立  
燈下立寂無言我所思兮在白門白門女兒傷夜半忽  
聽鷄鳴說失旦客孤耿耿衾不溫盧姬定不奈黃昏  
更前夜同徐楊二將方二登赤壁下誰知不覺吳興  
百萬戰艘橫江壓直與孫劉同會獵縱火乘風風怒號

人馬殘落如秋葉夏口武昌西復東深黑蒼陰莫辨中  
烈炬半續山前草古石吞江遠鑿空可憐抽刀斫案者  
微得周郎定計寡致使下馬露布上馬戈浩歎乘舟如  
乘馬鐵索連船船不行此時步將當成名灰飛亂射水  
聲急白日慘慘雲不平吳下南陽功半就身非容容福  
不厚只今心血老楊枯惟有山川不改舊登此感同今  
古深獨二嫖姚知我心安得破賊塗江水致使江東呼  
孫子

苦寒行

幾歲桑不熟原蠶復傷馬蓬麻不能耕縱是耕者無田  
野江南土地非瘠磽江北土地更肥饒無奈江北有農

半殺死餘得江南之人好笙簫甘心絲帛無一尺冷風  
刺人朝至夕陰雪墮地不肯消深夜飛來大如席老鳥  
舌僵不堪啼衰林啞啞若病癱主人重裘坐重閣安記  
關山被鐵衣鐵衣生凍人無力凍死敢向將軍泣孤營  
深黑不見天豈辨烽火東西急况有嚴令出三更軍中  
禁絕號寒聲十指盡折還寥寂敵人莫得知軍情嗚呼  
吾欲告天天不喜不知塗炭至如此熱則何必如炎蒸  
寒則何必寒如水

言別

范仲閣社集  
送劉客生

如今秦地歸不得秦地之人皆爲賊勸君且勿言歸秦  
路上荆榛覆死人君作征人不畏死河西六郡良家子

龍圖招客餞出城忽爾狂言我不行不行聊復與君語  
豈爲秦淮樓上女我獨知君知之深美人不足牽君心  
飲酒却忘治行李欲治行李無黃金黃金雖盡君不任  
奈此九月衣無絮可笑留君不可留予且別君華陽去

黃雀行

籬下有雀飲且舖五步十步日將籬下有深溝之急湍  
上有障天之蒿蘆以爲處此可咲巢屈之雀穴屈之獸  
爲人所誅孰知羅家之計巧矣夫蘇合彈之不能中網  
置施之不能動乃以重巒昇饌先作囹黃雀鼓尾搖頭  
卽入羅幸而得之不殺死破網一飛不知止空中忽遇  
一黃鵠問余倉皇何至此道之欲食滄海食道之欲飲



天池水黃鵠六翮健黃雀六翮柔生來羽翼各不同安  
得同之萬里游所以黃雀中路泣高伍不能有所立乃  
知古人遭逢聽彼蒼安能出入愁斷腸黃雀效鼠游

哀王孫

萬千市得青驪駒日向金馬門前驅犀甲翠羽光照日  
玉勒金鑣間美珠道以令騎先馳突後以奚兒作大呼  
執法達官莫敢問詰問必至遭非誣青袍小吏伏道左  
驚見貴人顏色殊有時鸞輿歸就國千里田園極膏腴  
狗馬食比敖倉粟萬錢不過供一厨出入童僕千手指  
左右幸姬皆名姝賓客稱觴多膝席夜半不敢亂步趨  
墨客樂於道盛事起舞壯夫特魁梧我爲王孫獨於邑

難將百歲此歡娛一旦告之二千石詔書十道發金吾  
門下腹心半撲殺階下五木侵肌膚始知貧賤保首領  
貴極人臣不如無哀哉古人當刑誅致歎黃犬東門隅

兵車行

十步之卒不當一馬十馬之力不當一車之馳下古者  
名將多知兵縱橫馬步在兼行更以堅車禦矢石走卽  
破敵立爲營郊原用馬易奔逐峻嶺用步易設伏摧鋒  
陷陣偏廂車施之亦在觀平陸老奴昨日來北關道賊  
休夏在英山輕車不可得方軌一步獨騎難躋攀哀哉  
金鼓旗幟賊有備兵一搜山卽失利火照山前中貴營  
夜半呼聲動天地兵擊其西賊又東我欲及時廢火攻

所以淮陰陣背水使知進生退則死如今且守轅門不  
必前有時賊去奏凱旋對山時火照山前中貴  
折檻行轉車不問其式一也國記謂  
龍鱗不可逆虎口不可道不見豐蔀有時蔽青天不見  
黑夜牽衣卽煬竈尚方雖有劍鋒鋒佞臣頭多寂不鳴  
世路忠臣不可得堯廷之草亦空生何以白馬生面扣  
過於骨鯁且見宥至有盛暑不衣冠帳中使人可其奏  
甚矣明主在忠言獨見無隱趙翁孫市臣野臣都言事  
流涕終非諫至意折檻朱雲強項宣到此千載竟茫然  
青鷄拏魚行謂不立木對川言故味食即游首珍  
竹條插水使不流竹竿壹丈鞭兩頭小船蕩蕩無絲網

老翁取魚非釣鉤載得滿船青黑鳥啄飲朝暮看饑飽  
飽則落水不捕魚饑又捕魚不輕狡鯉魚數尺口容拳  
三鷄兩鷄銜上船一群沒浪不空起水底蝦蛆安得全  
頸上帶環如服鐵喉下有魚不能咽吐出細魚多且鮮  
打入波中尋鯉穴魚何辜鳥何愚不及鷗鷺戲菰蒲石  
中蝦蟹隨意食爾銜鯨鯢食得無振羽齊鳴竿上立水  
下游鱗舟後泣相逢僥倖得生還作書鯉魴慎出入日  
落網罟榜歌回身船過此魚不來

嘉禾過朱子葆園中深談十日

萬松怒號清露墜淡月炤人人已醉有客鼓櫂吳越來  
相遇白門古荒寺此時坐嘯晚雲低君復高歌山前谿

石畔流泉光浩浩戶外螢火草萋萋有書不薦青雲鶚  
有火不燒老人藜予故偃蹇鍾山北君又遲遲大海西  
三年復對秦淮月把酒猶是舊顏色一琴一劍且蕭然  
誰哀王孫而進食數竒自笑天爲愁却信李廣不封侯  
三月春糧糧不足且作吹竽湖海游我聞少伯居攜李  
築有粧臺任西子君家宅近范大夫園亭門對大河水  
我來散髮坐中庭蓮葉田田蓮子青烟雨不來河流淺  
且命奚兒撥小舸君心最愛山樓好萬竹當軒暮歸鳥  
倚檻盼得漁舟來今朝且問魚多少沽爾魚救我厨與  
我臨池飲一壺醉折荷花供盤蔬我欲發君架上三千  
帙又欲別去之西湖

章臺柳

雙鳧飛渡青荷渚綠蕪朝烟迷白苧離妝初罷翠樓西  
杜鵑花老奈何許許多多鶯燕促芳菲鐵網珊瑚枝節稀  
春蠶午夜吐成箔停梭莫織合歡衣衣裳顛倒簾鉤影  
玉虎牽絲汲金井麝熏錦帳送輕風彩鳳翼垂霜露冷  
露冷畫裙素襪低憶昔兀坐章臺西郎控雕鞍珠勒馬  
青青楊柳一聲嘶嘶定投鞭繫高柳值儂理髮當窓牖  
鬢鎖金蟾燒石葉却送香風郎馬首馬認章臺路不岐  
短墻曲曲柳如絲孔雀屏開舒半臂挽郎駮駟歸去遲  
歸去烽高鱗雁絕始信垂楊輕送別夕陽枯樹失栖鸞  
夜半筵篋臺上咽臺上玉輪衰草黃楚珮誰嬌紫鳳凰

柳梢霜重條條白不似秋闈翠帶長帶長衣薄愁堪擣  
樹影婆娑人自老孤鴻叫殘海上雲嫁得東風願不保  
保儂身許韓王孫豈隨花月滯朱門夜助飛蟬粧不飾  
爲誰憔悴向黃昏黃昏星沒看河漢戶列旌旗人未散  
寶馬一鞭疾如風依舊韓郎青玉案

杏花歎

羅浮夢後梅子黃花花葉滿河陽鬢華有使別高唐  
花亦因人見短長風流五馬自清狂杏種千株園上芳  
春鳩鳴罷白如霜日夕依花歡宴張龍頭瀉酒琥珀光  
虬燈挂樹吹笙簧花神歡笑舞霓裳太守遣使索平康  
幘網朱絲穿象床月姊鷄翹響明璫舞裙歌扇鬧花傍

雲衣風暖花飛揚一群斜點壽陽妝珠串咽喉聲變商  
明星炤人色相當孰是小姑真無郎太守醉後指東方  
夜深妓散歸蘭房老杏忽然生慨慷百年一日轉淒涼  
胭脂冷落瑤艸荒有人鋤圃種青桑

吳江舟中懷方大密之

落木臨荒渡愁人不忍看江湖雙雁迥風雨一燈寒越  
鳥飛鄉夢吳帆帶日殘長橋秋色好遙隔海雲端

焦山暮游

孤櫂聲悲切登高多遠情風吹楊子樹月照呂公城帆  
落流雲斷江平寒水清草廬今已沒何處弔焦生

金陵感懷五首

蔓草彌中野多言妖有麟楊雄書却富蔡澤相非貧不  
愈頭風檄誰裁角墊巾可憐千古士無一不依人  
城南兼郭北日日陣雲平不變旌旗色翻加枹鼓聲壯  
丁投鳩毒債帥餌鴟羹露布連朝動多繇典禁兵  
王廷移塞下晝夜發銅符六郡城門閉三邊戰士無金  
堪歸貝勒飯不失休屠雖得封侯賞何年拜郅都  
羅織從來巧還疑廷尉平車茵汗重罪革履曳新聲但  
得蒼鷹吏深嫌白馬生檻中常有劍只自作悲鳴  
當階鋤屈軼扇不避飛塵盧子難醫國羊公豈醜人高  
垣還屬耳北寺易搖唇秋浦蘆中擢琮璜隱釣綸

懷梅朗三

草閣多遺帙常懷書帶聲寺中尋老叟石上臥先生人  
自求羊薦時難得許評長江南以北還望謝宣城

懷楊龍友

遙思吳下水遶過德門清天馬堪爲友人龍亦可名石  
經先負笈鏡鼓在吹笙若水無南使長通賦已成

懷方密之

莫憚舟車意年年作遠遊一時爭六角千里慕雙鉤奇  
計尋公瑾危言問仲謀憐君成七解天下不知愁

懷吳子遠

昔作延陵子朝遷淮水傍父書傳太史家集比中郎封  
墓當鷄毀憂時發癩瘁立朝誰者薦一鶚已翱翔

虞山訪錢牧齋先生不值  
春風吹綠柳  
白沙圍翠竹  
烟水共蒼茫  
北海人猶在  
洪喬刺未將  
堂無歌劍  
客室有較書  
郎已識門前路  
秋期話政長

同陸驥武信宿遽然妙香禪院

更餘禽定後  
冷月淡楓林  
曲肱床邊夢  
優曇樹下心  
疎櫺佛火  
雲破衲野風  
深霜到衣裳  
濕猶聞鐘磬音

宿廣濟菴

客心無一事  
只是不安眠  
秋思因風亂  
寒潮隨雨添  
燈孤荒旅寺  
犬吠隔溪船  
可奈數啼鳥  
啾啾谷口懸

西湖傷秋三首

浮雲西北起  
意自秣陵來  
入夢先迷路  
當歸懶上臺  
病

深寒中骨歌  
久聽生哀  
千里持家信  
躊躇不忍開  
夜深銀燭短  
旅閣滿湖風  
斗米千群鼠  
庭秋四壁蟲  
三星生桂樹  
缺月挂青楓  
羅刹江邊水  
時時潮信通  
細雨南飛雁  
鄉書只自疑  
已知游子病  
不信越人醫  
羈客秋來倦  
傷兒醉後悲  
玉階芍藥老  
當得怨歸遲

渡淮

北風慘淡滿  
離觴湛湛愁  
心春水長  
二月繁霜迷  
古渡五更白露冷  
征裳千村野  
听荒烟斷  
一望平原草  
色黃  
嘹唳不知天  
外雁  
嗷嗷何事獨  
南翔

贈周勒卣

知君湖海一扁舟  
好挾青萍賦遠游  
玄草十年沉桂閣

白沙三日望椒丘桓伊江上風傳笛孫楚洲前月滿樓  
慷慨相逢同擊筑談經何以得封侯

旅中曹梁甫見訪喜賦

鳳凰臺下大江流文苑淒涼古石頭百里寶刀牛渚夜  
三山寒杵帝城秋南皮逸響留秦郡西漢遺風屬晉州  
班馬蕭蕭林閣外與君共醉仲宣樓

建業寄陳臥子

寂寞樓船江水頭蕭疎古樹動離愁鳴琴最怨三山夜  
擊筑空歌九月秋南雁不來懷錦字西風吹入滿青樓  
嶂中太息書多少日日樽前醉蒯緱  
至石城見密之選詩告成悲歌一夜

大江南北欲丘墟何用傳經在石渠驅馬長干思故國  
閉門荒寺著新書漢臣暴露誰遺扇楚客成騷問卜居  
七序知君三易草素餐恐不獨慚予

潛江舟次病懷劉阮仙

烽火迷離古道難王孫有飯不加餐一時露草爭搖落  
十月霜衣病苦寒游子夢生湘水濶故人家在楚雲端  
寄來短札言兵事猶笑燈前髮指冠

別齊遜立

霜餘寒葉亂飛塵並馬彎弓渡漢津入幕上賓勞問鬼  
出關童子且因人襜褕說盡龐公略縞紵慚加范叔貧  
三月別君君尚住食梅易得見酸辛

寄謝瑞昌趙邑侯

擢度西江孤燧餘還家千里不乘車  
奚祈特為求羊舌張祿如今是范睢  
深祝花驄來客夢蚤隨黃雀謝君書  
獄中莫使雙龍劍日日相看亦笑予

過左碩人山中重弔中丞公

松竹青青悲且歌孤兒泣下盼庭柯  
深宮有詔封還少北寺懸金購募多  
最是傷心階下杖無如夜扣鞞中戈  
慰君風雨寒知閣莫向殘詩咏蓼莪

同張五叙宿燕子磯

野步青莎返照陰振衣孤嶼且高吟  
沙洲客醉燒魚肆山剝僧多煮鶴心  
日夜長江流不盡風霜古樹老還深

到來始信秋聲苦共爾通宵冷布衾

吳鑑在自閩來浙相遇湖上各道旅况

方舟多載武夷雲南北寒暄阻雁群  
老僕不憐蕭穎士

鑑在有無詩亦瘦沈休文予方荔枝一熟思飛騎尊菜

初肥憶使君珮解清風江上苦夜闌  
斜倚麝香裙鑑在

約有

西湖贈沈君牧

青青楊柳六橋隅獨羨門臨西子湖  
山畔野花招楚客

舟中白紵唱吳趨火明深夜書三架  
月照寒窓書一厨

欲起秋溪歸短櫂逢君為問北風圖

拜岳墓



百萬南人帶血戈，朱仙一擊戰功多。  
蒙恬舉衆能除趙，宗澤知君續渡河。  
自有繡旗歸太尉，却將金節走休哥。  
不還二帝身猶恨，嘗駕陰風逐白波。

贈徐蘭生

菱荷香送水邊廬，人讀先秦兩漢書。  
家住深山嘗射虎，船牽野舫卽烹魚。  
潮歸蓴菜秋風老，雨歇梧桐夜月虛。  
孤客所聞逮所見，江頭楓落近何如。

飛來峰前當壚甚，可人意同幼光醉。  
飲喜雨留行

二首

一天陰雨滯雲阿，橋上魂銷奈若何。  
翡翠繡衾隨犢鼻，鳳凰孤管咽蠻歌。  
石郎隔水呼溪女，靈鷲移峰換芋蘿。

不動琴心人亦解，欲將襪被近湘娥。  
巫山巫峽路崎嶇，攜得朝雲晚度湖。  
醉醒却關孤客恨，笑顰自畫美人圖。  
瑤姬魂易歸秋草，竈妾情癡代旅厨。  
五馬曾過桑陌上，羅敷不愛大秦珠。

靈隱寺

古寺微霜欵木奴，蘿封石塔老山隅。  
乘風招鶴湖邊放，帶月馴猿洞口呼。  
身定樹間驚佛磬，泉從竹裏下僧厨。  
客兒亭畔深深艸，野衲懷人夢有無。

孤山舟夜待月同陳臥子吳次尾賦

嶺外秋雲樹杪烟，孤山招隱問高賢。  
荆卿去魯非爲客，子晉吹笙卽是仙。  
九里松楸頽古道，六橋楊柳憶當年。

漁歌歷歷荒燈下醉裡聲聞酒肆邊

荅錢牧齋先生

夢餘紅葉寺邊霜芒屨蹒跚印畫廊藥採南山芝欲紫  
船歸輞口橘應黃酒銷公子瑠璃竿閣起平津玳瑁梁  
白石滄江漁火路獨能無意向明光

謁太白祠

水聲夜半雜風聲灑酒青天問月明憐我依人爲逐客  
笑君先我作狂生長鯨但是寒江怪老馬空傳絕塞名  
不信肆中沽一醉深宮猶得草清平

弔長安

太白星從帝座流指南何法縛蚩尤山陵不獲三千躋

滄海誰施八耀舟垂控澗邊無駿馬賜緋殿上識獼猴

蒿堪爲柱宮猶壞梅木年年到石頭

呆愚巧奏溟寒胡共說中庖產翠苻貫索數星明獨柳  
欂櫨生角照長榆譙周有表陳乾象鍾雅無心懼董狐  
露印踐平沙上草西風夜哭范龍圖

繡屣難登記里車一時宮怨撥琵琶丹鉛盡掩鷄人淚  
縞素先簪牛女花竹染蒼梧新護塚旗翻青海泣歸家  
可憐苜蓿秋風裡不見聲嘶千里騶

萬雉迢迢覆金雲虞絃向日鼓南薰漢妃抱璽終難痊  
胡母持裘不忍焚赤羽未傳銅馬帝白旗先插李鴉軍  
玉關幸有包胥哭左右賢王可盡聞

碧殿深深杜宇啼六宮花草曉雲衰紫雲終不移芒碭  
白璧何人投瀉池龍種却從江介化鷄竿莫赦日中期  
甬東築室吳爲沼多使良金寫范蠡

東甌曉發

閣對平帆夜雨中人從天外盼歸鴻沙頭烟樹搖新綠  
霧裡村燈淡遠紅兩岫椰鳴茅店火一江潮響石門風  
閒雲片片藏孤峽不鎖寒流流向東

贈姚彥深

浦近春申好結廬種成蘿薜自攀裾鑿池編柳因調鶴  
畫水操舡禁罟魚寄廡客知新杵日到門人識舊圖書  
上方鐘罷僧歸院應是幽人禮佛餘

舟中與驤武夜話

欲倚秋深戰檻凭時危安得老漁曾村鷄失曙猶堪舞  
泥馬臨江未可乘仲友何時來作將賓王尚喜不爲僧  
莫將萍梗浮流水且復深談續夜燈

與甥姪夜話

居近青山水近籬霜宵月下老梅枝閒隨野叟調牛飯  
寒向村翁購鹿皮銀管懶書傷逝賦家人唱出已焚詩  
莫將絲竹如山水夢裡登臨只自疑

初度自刺

絕巘孤烟繞赤城晚風吹雨濕行旌馬援非是遊無策  
鄧禹多應咲不情山苧可裁高士服海波難濯楚臣纓

論兵切莫衝冠怒家破惟餘髮數莖

從括蒼河夜抵東甌二首

春山花盡月初升水上南雲夜獨澄臥虎忽驚樵獵火  
遊魚偏觸網船燈沙隄平綠迷芳草石谷懸流落澗水  
夜夢不離桃葉渡卽歸已是白頭僧  
曉烟初出一村齊坐看潮平春草低片月高懸千嶺樹  
孤舟先泊萬山谿荒中夜色明如晝靜裡河聲響到西  
小閣霜深人正臥却催前路話晨鷄

東甌別大姪振公

鷄從霧裡鬧潮聲軋軋飛船返樂清時到偏安思隱法  
人因離亂欲謀生好過鴈宕看鴻下何處龍眠擁犢耕  
寄語阿兄深避去莫教馬岌最多情

湖上遇許霞城先生

十歲湖邊夢無絲生羽翰薄春三月米時煮一人餐劍  
拔東門外船歸野月端孤琴聊自適短缺不能彈身病  
羸非渴天風秋作寒家遷離虎口客久辨猪肝幸對高  
山色相逢曲檻寬舊交留杵臼新士賴衣冠護得堯廷  
艸鋤將當戶蘭驂騶隨步穩翡翠落巢安霜冷青綾被  
聲無碧玉鑿蘆花疑鬢白楓葉照心丹北海尊猶在元  
規塵未殘在泉知飲足惡木息陰難瓊闥觀封事琮璜  
上釣竿星規南斗近雲樹發清歡

塞門歌

白草狐兔驕控弦天山下健兒聞笳聲一聲齊上馬

俠士歌

白驥賽秋霜烏弓如楚鐵尊前磨寶刀洗盡仇家血

聞笛

江樓弄玉簫孤客泪如雨不聽梅花聲那知離別苦

少年行

俠士輕生在一言寶刀如雪伴王孫沙場不惜爲君死  
願待明朝往報恩

惜春詞

長堤楊柳綠如絲醉殺遊人天暮時春花不欲春長在  
故使春風一夜吹

西湖竹枝詞五首

芳草青青覆兩隄野雲初起一峰齊客來孤坐深深艇  
莫辨湖山東與西

日挂西山鳥雀喧樓船寂寞住前村楚江獨有顛狂客  
夜打湖邊酒肆門

簫鼓前山與後山段橋時去又時還畫船蕩漾春秋水  
只在西湖兩岸間

梅梁綺閣日初紅燕子將雛巢不空樓下賣花聲宛轉  
珠簾輕起問春風

日上凝妝向水湄停橈爲問鄂墳枝妾身代作銀瓶女  
打殺當年秦太師

其詩之於世也猶如日月之於天也

其詩之於世也猶如日月之於天也

其詩之於世也猶如日月之於天也

其詩之於世也猶如日月之於天也

其詩之於世也猶如日月之於天也



